

Unammilleqatigiinneq pillugu Inatsisartut inatsisaat pillugu Namminersorlutik Oqartussat nalunaarutaat (unammilleqatigiinnermut inatsit)

Matumuuna Unammilleqatigiinneq pillugu Inatsisartut inatsisaat nr. 1, 15. maj 2014-imeersoq, Inatsisartut Inatsisaat nr. 24, ulloq 17. november 2017-imeersoq, Inatsisartut Inatsisaat nr. 8, 12. juni 2019-imeersoq aamma Inatsisartut Inatsisaat nr. 8, 19. november 2020-meersoq allannguutit malitsigisai ilanngullugit nalunaarutigineqarpoq.

Kapitali 1

Siunertaa atorineqarfissaalu

§ 1. Inatsisartut inatsisaanni siunertaavoq suliffeqarfinnut atuisunullu iluaqutaasumik sunniuteqartumik unammilleqatigiinnikkut inuiaqatigiinni sunniuteqarluartumik isumalluutinik atuinissamik siuarsaanissaq.

§ 2. Inatsisartut inatsisaanni inuussutissarsiorluni suliaqarneq sunaluunniit kiisalu inuussutissarsiorluni suliaqarnissamut pisortat aningaasaatai atorlugit tapersiisarneq pineqartunut ilaapput.

Imm. 2. Unammilleqatigiinnermik killiliineq pisortat maleruagassiinerisa toqqaannartumik malitsigisimappagu imaluunniit pisariaqartumik malitsigisariaqarsimappagu, kapitali 2-imi, 3-imi aamma 4-imi maleruagassat atuutissanngillat. Unammilleqatigiinnermik killiliineq kommunalbestyrelsimit aalajangersarneqartoq, kommunalbestyrelsip inatsisit naapertorlugit suliassanik naammassinnissinnaanissaanut pisariaqarsimappat aatsaat toqqaannartumik imaluunniit pisariaqartumik tamanut maleruagassiinerup malitsigisimassavaa.

Imm. 3. Aalajangiineq kommunit ataatsimoorlutik aalajangiigaat, takuuk inuussutissarsiornikkut suliaqarnermut il.il. aningaasaliinikkut inuussutissarsiornermik ineriartortitsinissamut iluaqusiinissamut kommunit periarfissaqarnerat pillugu Inatsisartut inatsisaat, aalajangiinernut kommunalbestyrelsimit aalajangerneqartunut sanilliunneqassaaq, takuuk imm. 2.

Imm. 4. Unammilleqatigiinnermut ataatsimiititaliaq isumaqarpat tamanut maleruagassiineq imaluunniit tapersiisarnermut aaqquissuusaq unammilleqatigiinnermut ajoqusiisumik sunniuteqarsinnaasoq imaluunniit allatigut inuiaqatigiinni isumalluutinik sunniuteqarluartumik atuinissamut akornusiisinnaasoq, Unammilleqatigiinnermut ataatsimiititaliaq unammilleqatigiinnermut ajoqusiisumik sunniuteqarnerinik uparuaalluni Naalakkersuisunut tunngavilersukkamik oqaaseqaateqarsinnaavoq kiisalu suliassaqaqfimmi unammilleqatigiinnissamik siuarsaasussanik siunnersuuteqarsinnaalluni. Naalakkersuisut Unammilleqatigiinnermut ataatsimiititaliap oqaaseqaataata tiguneranit kingusinnerpaamik sapaatit

akunnerisa 4-it qaangiunneranni Unammilleqatigiinnermut ataatsimiititaliap oqaaseqaataanut akissuteqassapput. Unammilleqatigiinnermut ataatsimiititaliap piffissaliussaq sivitsorsinnaavaa.

§ 3. Inatsisartut inatsisaanni aningaasarsianut sulinernullu pissutsit pineqartunut ilaangillat. Taamaattoq Unammilleqatigiinnermut ataatsimiititaliap suliaqarnerminut atugassatut kattuffinnit suliffeqarfinnullu aningaasarsianut sulinernullu pissutsit pillugit paasissutissat piumasinnaavai.

§ 4. Kapitali 2-imi aalajangersakkat suliffeqarfiup imaluunniit suliffissuup ataatsip iluani isumaqatigiissutitut, akuersinernut aamma suleriaatsinut ataqatigiissitanut atuutinngillat.

Imm. 2. Naalakkersuisut Unammilleqatigiinnermut ataatsimiititaliap oqaaseqaataanik piniareernermini imm. 1-ip atorneqarnera pillugu maleruagassanik aalajangersaasinnaapput, ilanngullugit suliffeqarfiup imaluunniit suliffissuup ataatsip iluani isumaqatigiissutit, akuersinerit aamma suleriaatsit ataqatigiissitat qanoq paasineqassanersut pillugu maleruagassat.

§ 5. Inatsisartut inatsisaat manna malillugu niuerfiit attuumassuteqartut killissalersorneqarnerat piumanninnermut aamma neqeroortitsinnermut taarsiisarnermik aamma unammilleqatigiinnissamut periarfissaqarneranik misissuinerit tunngavigalugit pissaaq. Unammilleqatigiinnissamut periarfissaqarnera misissorneqassaaq, suliffeqarfiit akuusut niuerfimmil attuumassuteqartumi inissisimanerat uppersarsarneqarsimagaangat, aammalu inissisimaneq taanna Inatsisartut inatsisaat unioqqutinneqarsimanersooq nalornissuteqalersitsisimagaangat.

Imm. 2. Unammilleqatigiinnermut ataatsimiititaliaq imm. 1 malillugu naliliinnermut atugassatut sulianik ilisimasalinnik avataaneersunik peqataatitsisinnaavoq.

Kapitali 2

Unammilleqatigiinnermik killilersuisumik isumaqatigiissuteqarnissamut inerteqquteqarneq

§ 6. Suliffeqarfiit isumaqatigiissutit toqqaannartumik imaluunniit toqqaannanngitsumik unammilleqatigiinnermik killiliinissamik siunertaqartunik imaluunniit malitseqartussanik isumaqatigiissuteqarnissaat inerteqqutaavoq.

Imm. 2. Imm. 1 malillugu isumaqatigiissutit assersuutigalugu imarisinnaavaat:

- 1) pisinissamut imaluunniit tunisinissamut akiusunik imaluunniit allanik niuernermut tunngavissarititaasunik aalajangersaanerit,
- 2) tunisassiornerup, tunisisarnerup, teknikkikkut inerisaanerup imaluunniit aningaasaliinerit killilersornissai imaluunniit nakkutigineqarnissai,
- 3) niuerfiit imaluunniit pilersuiffiit aggulunnissaat,
- 4) niuernermi suleqatinut sullississutitut assigiimmik naleqartunut naliinginngitsumik atugassarititaasussanik atuinnissaaq, taamaaliornikkut unammilleqatigiinnermik ajornerulersitsisussaaq,
- 5) isumaqatigiissuteqatigineqartup tapiliussatut sullississutit pissusissamisoornerminni imaluunniit niuernermi pissusiusartut malillugit isumaqatigiissummut attuumassuteqanngitsut akuerisassagai, isumaqatigiissuteqarnermut atugassarititaasussatut piumasaqaatigineqassasoq,
- 6) suliffeqarfiit marluk amerlanerusulluunniit, suliassanut aalajangersimasunut suleqatigiiffimmik pilersitsinermikkut, unammilleqatigiinnikkut pissusilersornerminnik ataqatigiissitsinerat, imaluunniit

7) tuniseqqinnerni akiusunik saneqqunneqarsinnaanngitsunik aalajangersaanerit imaluunniit allatut iliornikkut niuernermit suleqataasup ataatsip arlallilluunniit tunisinermi akiusussanut ilitersuinernik saneqqutsinnaanngitsinniarneri.

Imm. 3. Imm. 1 aamma suliffeqarfiit kattusimaffiata iluani akuersinernut aammalu suliffeqarfiit akornanni ataqatigiissitamik suleriaaseqarnernut atuuppoq.

Imm. 4. § 6, imm. 1-imik unioqqutitsinerit unitsinniarnissaat siunertaralugu, Unammilleqatigiinnermut Ataatsimiititaliaq peqqusissuteqarsinnaavoq, takuuk § 28. Imm. 1-imut atatillugu Unammilleqatigiinnermut Ataatsimiititaliap nangaanartoqartitsinera sillimaffigiinarlugu, ataatsimiititaliap aamma suliffeqarfiup neriorsuuteqarneri saneqqunneqarsinnaanngitsutut inississinnaavai, takuuk § 29.

Imm. 5. Isumaqatigiissutit akuersinerillu imm. 1-3 malillugit inerteqqutaasut, taakkua § 7 malillugu ilaatinneqanngitsunut ilaasimanngippata, § 8 malillugu atuutsitsivunngitsunut ilaasimanngippata, § 9 malillugu nalunaarummi pineqartunut ilaasimanngippata imaluunniit § 10 malillugu ataatsimoortunik pineqartunut ilaatsinnginnermi ilaasimanngippata, atuuttussaangillat.

§ 7. § 6, imm. 1-imik inerteqquteqarneq atuutissanngilaq:

1) isumaqatigiissut suliffeqarfiit niuerfinni kalluarneqartuni unammilleqatigiittut imaluunniit unammilleqatigiilersinnaasut akornanni isumaqatigiissuteqarneq pisimappat, niuerfinni arlaanniluunniit attuumassuteqartuni isumaqatigiissummi kalluarneqartuni isumaqatigiissuteqarnermi suleqataasut ataatsimut katillugu niuerfimmiiitaat 10 procentimit annertunerunngippata, taamaattoq takuuk imm. 2 aamma 3,

2) isumaqatigiissut suliffeqarfiit niuerfinni kalluarneqartuni unammilleqatigiinngitsut imaluunniit unammilleqatigiilersinnaanngitsut akornanni isumaqatigiissuteqarneq pisimappat, niuerfinni arlaanniluunniit attuumassuteqartuni isumaqatigiissummi kalluarneqartuni isumaqatigiissuteqarnermi suleqataasut ataatsimut katillugu niuerfimmiiitaat 15 procentimit annertunerunngippata, taamaattoq takuuk imm. 2 aamma 3, imaluunniit

3) isumaqatigiissummi suleqataasut ataatsimut katillugu kaaviiaartitaat 5 millioner koruuninit amerlanerunngippata, taamaattoq takuuk imm. 2 aamma 3.

Imm. 2. imm. 1-imik ilaatsinnginneq atuutissanngilaq, suliffeqarfiit imaluunniit suliffeqarfiit kattuffiata isumaqatigiissutigippagu, ataqatigiissippagu imaluunniit akuerippagu:

1) nioqqutissanik imaluunniit kiffartuussissutinik tunisinermut imaluunniit akiusut, iluanaarutissat il.il.,

2) tunisassiornermik imaluunniit tunisinermut killilersuinissaq,

3) niuerfinnik imaluunniit sullitanik agguluineq, imaluunniit

4) sioqqutsisumik neqeroorutinik iluarsinissaq, neqerooruteqarnissamut ammaassinissamut tunngavissarititaasunik aalajangersaaneq, neqeroorutinik kinguartitsineq, neqeroorutinik sioqqutsisumik nalunaaruteqarneq imaluunniit neqerooruteqarnissaq sioqqullugu qanorluunniit ilusilimmik suleqatigiinnissaq.

Imm. 3. § 6, imm. 1-imik inerteqquneqarneq atuutissaaq, imm. 1-imik suliffeqarfiit akornanni isumaqatigiittoqarnera, suliffeqarfiit kattuffiata iluani akuersineq aamma suliffeqarfiit akornanni suleriaatsinik ataqatigiissitsineq apeqqutaatinagu, taakkua isumaqatigiissutit, akuersinerit imaluunniit suleriaatsinik ataqatigiissitsinerit assingusut, unammilleqatigiinnermik killiliisimappata.

Imm. 4. Isumaqatigiissut unammilleqatigiit akornanni imaluunniit unammilleqatigiinngitsut akornanni isumaqatigiissutaasoq immikkoortikkuminaassimappat, killissaliussatut naliusoq 10 procentiusoq

atuutissaaq.

Imm. 5. Imm. 1-imi ilaatitsinnginneq atuutissaaq, nr. 1-imi aamma 2-imi niuerfimmiiitat killissaliussamut naliusunit 10 procentiusumit 15 procentiusumillu, qaammatisiutit malillugit ukiuni tulleriinni marlunni 2 procentpointinik 2-init annertunerusumik annertunerusimanngippata.

Imm. 6. Naalakkersuisut Unammilleqatigiinnermut Ataatsimiititaliamit oqaaseqaateqaqqusereerneramik kingorna, imm. 1, nr. 3 malillugu kaaviiaartitanik naatsorsuisarneq pillugu maleruagassanik, kiisalu imm. 1, nr. 1-imi aamma 2-imi, takuuk imm. 5, niuerfimmiiitat annertussusissaannik annikinnerusumik qaangiinnermi ilaatitsinnginnermut maleruagassanik aalajangersaasinnaapput.

§ 8. Unammilleqatigiinnermut Ataatsimiititaliap nalunaaruteqartoqarnerata kingorna suliffeqarfiit akornanni isumaqatigiissutit, suliffeqarfiit kattuffiata iluani akuersinerit imaluunniit suliffeqarfiit akornanni suleriaatsinik ataqatigiissitsinerit § 6, imm. 1-imi inerteqquteqarnermi ilaatinngissinnaavai, Unammilleqatigiinnermut Ataatsimiititaliaq naliliiguni tamanna:

- 1) tunisassiornerup imaluunniit nioqqutissanik imaluunniit kiffartuussissutininik siammarterinerup sunnuteqarluartumik ingerlanerata pitsanngorsarnissaanut iluaqutaasooq imaluunniit teknikkikkut aningaasaqarnikkulluunniit ineriartornermik siuarsaasooq,
- 2) taamaaliornermi atuisartut pisisartullu iluaqutissartaasunik naleqquttumik pissarsinissaat qulakkeerneqartoq,
- 3) suliffeqarfinnut siunnerfusut taakkua angunissaannut pisariaqanngitsumik killilersuisunik pisussaaffliinngitsut, aamma
- 4) nioqqutissat imaluunniit kiffartuussissutit pineqartut ilaannut annertuumut unammilleqatigiinnissamik mattussinissamik suliffeqarfinnut periarfissiinngitsooq.

Imm. 2. Isumaqatigiisummik, akuersinermik imaluunniit suleriaatsimik ataqatigiissitamik pineqartumik imm. 1 malillugu ilaatinneqannginnissamik piumasaqarluni nalunaaruteqarneq Atuisartoqarnermut Unammilleqatigiinnermullu Aqutsisoqarfimmut tunniunneqassaaq. Unammilleqatigiinnermut Ataatsimiititaliaq nalunaaruteqartarneq pillugu maleruagassanik aalajangersaassaaq, ilanngullugu immikkut nalunaaruteqarnermi immersugassanik atuinissaaq.

Imm. 3. Imm. 1 malillugu aalajangiinerni allanneqassaaq ilaatitsinnginneq piffissami sumi atuunnersooq. Ilaatitsinnginneq siusinnerpaamik piffissamit nalunaaruteqarnerup pineranit atuutilersinnaavoq. Ilaatitsinnginneq atugassarititaasussat tunngavigalugit akuerineqarsinnaavoq.

Imm. 4. Nalunaaruteqareernerup kingorna Unammilleqatigiinnermut Ataatsimiititaliaq naliliippat imm. 1-imi tunngavissarititaasut sulii piusut, Unammilleqatigiinnermut Ataatsimiititaliap ilaatitsinnginneq sivitsorsinnaavaa. Imm. 3 taamatuttaaq atuutissaaq.

Imm. 5. Unammilleqatigiinnermut Ataatsimiititaliap imm. 1 imaluunniit imm. 4 malillugu aalajangiineq allanngortissinnaavaa imaluunniit utertissinnaavaa, imaattoqarpat:

- 1) aalajangiinnermut immikkoortumi pingaaruteqartumi pissusiviusut allannguuteqarsimasut,
- 2) isumaqatigiisummi, akuersinermi imaluunniit suleriaatsimi ataqatigiissitami peqataasut, atugassarititaasussat malinngippasigit, imaluunniit
- 3) aalajangiineq isumaqatigiisummi, akuersinermi imaluunniit suleriaatsimi ataqatigiissitami peqataasunit paasissutissat eqqunngitsut imaluunniit uukapaatitsisut tunngavigalugit pisimappat.

§ 9. Unammilleqatigiinnermut Ataatsimiititaliap suliffeqarfimmit imaluunniit suliffeqarfiit kattuffiannit nalunaaruteqareernerup kingorna nalunaarutigisinnaavaa, isumaqatigiissut, akuersineq imaluunniit suleriaaseq ataqatigiissitaq pissutsit Unammilleqatigiinnermut Ataatsimiititaliap ilisimasai malillugit § 6, imm. 1-imi inerteqquteqarnermi pineqartunut ilaangippata, taamaattumillu § 6, imm. 4 malillugu peqqusissuteqarnissamut tunngavissaqanngitsoq. Unammilleqatigiinnermut Ataatsimiititaliaq nalunaaruteqartarneq pillugu maleruagassanik aalajangersaassaaq, ilanngullugu nalunaaruteqarnermi immikkut immersugassamik atuinnissaaq pillugu maleruagassat.

§ 10. Naalakkersuisut Unammilleqatigiinnermut Ataatsimiititaliamit oqaaseqaateqaqqusereermermi kingorna isumaqatigiissutinut, akuersinernut imaluunniit suleriaatsinik ataqatigiissitanut ataatsimoortunut § 8, imm. 1-imi tunngavissarititaasunik naammassinnittunut § 6, imm. 1-imi inerteqquteqarnermi ilaatitsinnginnissaaq pillugu maleruagassanik aalajangersaasinnaapput.

Imm. 2. Suliffeqarfinnut kattuffiup iluani isumaqatigiissutit, akuersinerit imaluunniit suleriaatsit ataqatigiissitat, ataatsimoortumik ilaatitsinnginnermi imm. 1 malillugu akuerineqarsimasumi pineqartunut ilaasut, pisumi aalajangersimasumi § 8, imm. 1-imi tunngavissarititaasunut naapertuutinngitsumik sunnuteqarsimappata, Unammilleqatigiinnermut Ataatsimiititaliap suliffeqarfinnut isumaqatigiissummi akuusunut ataatsimoortumik ilaatitsinnginneq atorunnaarsissinnaavaa.

Kapitali 3

Pissaaneqarnerusumik inissisimanermik atornerluisarneq

§ 11. Suliffeqarfimmut ataatsimut arlalinnulluunniit pissaaneqarnerusumik inissisimanermik atornerluinissaaq inerteqqutaavoq.

Imm. 2. Imm. 1 malillugu atornerluineq assersuutigalugu pisimasinnaavoq:

- 1) toqqaannartumik imaluunniit toqqaannangitsumik pisinermi imaluunniit tunisinermi akiusunik naapertuutinngitsunik imaluunniit allanik niuernermi tunngavissarititaasunik naapertuutinngitsunik pinngitsaaliissuteqarnermi,
- 2) tunisassiornermi, tuniniaanermi imaluunniit teknikkikkut inerisaanermi atuisartunut pisisartunullu ajoqutaasumik killilersuineri,
- 3) niueqatigisanut sullississutinut assigiimmik naleqartunik atugassarititaasunik naligiinngitsunik atuineri, taamaaliornermilu unammilleqatigiinnermi ajornerusumik inissisimatitsilernermi, imaluunniit
- 4) isumaqatigiissuteqarnermut atugassarititaasussatut, isumaqatigiissuteqaqataasup tapiliussatut sullississutit, pissusissamisoornerminni imaluunniit niuernermi pisartut malillugit isumaqatigiissummi ilaasunut attuumassuteqanngitsut, akuerissagai piumasaqaateqarnermi.

Imm. 3. Imm. 1-imi unioqqutitsinerit unitsinnissaat siunertaralugu Unammilleqatigiinnermut Ataatsimiititaliaq § 28 naapertorlugu peqqusissuteqarsinnaavoq. Unammilleqatigiinnermut Ataatsimiititaliap imm. 1-imut tunngatillugu nangaanartoqartitsinera sillimaffiginarlugu, ataatsimiititaliap aamma neriorsuutit suliffeqarfiup tunniussimasai saneqqunneqarsinnaanngitsunngortissinnaavai, takuuk § 29.

Imm. 4. Unammilleqatigiinnermut Ataatsimiititaliaq suliffeqarfimmit ataatsimit arlalinniilluunniit nalunaaruteqareernerup kingorna nalunaaruteqarsinnaavoq, pissusilersorneq aalajangersimasooq, pissutsit Unammilleqatigiinnermut Ataatsimiititaliap ilisimasai malillugit imm. 1-imi pineqartunut

ilaanngitsut, taamaattumillu imm. 3 malillugu peqqusissuteqarnissamut tunngavissaqanngitsoq.

Imm. 5. Unammilleqatigiinnermut Ataatsimiititaliap apeqquaqartoqarneratigut nalunaaruteqassaaq, suliffeqarfik ataaseq arlallilluunniit pissaaneqarnerusumik inissisimanermik atuinersut.

Unammilleqatigiinnermut Ataatsimiititaliaq nalunaaruteqarpat, suliffeqarfik pissaaneqarnerusumik inissisimanermik atuinngitsoq, Unammilleqatigiinnermut Ataatsimiititaliap taassuminnga utertitsinissaata tungaanut nalunaaruteqarneq allanngortinneqarsinnaanani atuutissaaq.

Imm. 6. Unammilleqatigiinnermut Ataatsimiititaliaq najoqqutassat imm. 4 imaluunniit 5 malillugit aalajangiinissamut atugassat pigineqartussat pillugit maleruagassanik aalajangersaasinnaavoq.

Kapitali 4

Unammilleqatigiinnermik equtitsisumik tapersiisarneq

§ 12. Unammilleqatigiinnermut Ataatsimiititaliaq peqqusissuteqarsinnaavoq, inuussutissarsiornermi suliaqarnernut aalajangersimasunik iluseqartunut iluaqutaasumik pisortat aningaasaatai atorlugit tapersiissuteqarneq unitsinneqassasoq imaluunniit utertinneqassasoq.

Imm. 2. Peqqusissuteqarneq nalunaarutigineqarsinnaavoq, tapersiissutaasoq:

- 1) toqqaannartumik imaluunniit toqqaannangitsumik unammilleqatigiinnermik equtitsinissamik siunertaqarpat imaluunniit malitseqarpat, aamma
- 2) pisortat maleruagassiisarnerat naapertorlugu inatsisinut naapertuutinngippat.

Imm. 3. Tapersiissuteqarnerup utertinneqarnissaa pillugu peqqusissuteqarneq, inuussutissarsiornermik suliffeqarfinnut namminersortunut, sullissivinnut imminut pigisunut kiisalu suliffeqarfinnut tamakkiisumik ilaannaasumilluunniit pisortanit pigineqartunut ingerlatseqatigiiffittut ingerlanneqartunut, sammitinneqarsinnaavoq. Tapersiissuteqarnerup utertinneqarnissaa pillugu imm. 1 malillugu peqqusissuteqarneq aamma suliffeqarfinnut tamakkiisumik ilaannaasumilluunniit pisortanit pigineqartunut, ingerlatseqatigiiffinnut assigusumik iluseqartumik ingerlanneqartunut, erseqqinnerusumik aalajangerneqartunut sammitinneqarsinnaasoq pillugu maleruagassanik Naalakkersuisut aalajangersaasinnaapput.

Imm. 4. Unammilleqatigiinnermut Ataatsimiititaliap pisortanit tapiissutit utertinneqarnissaannik peqqusissuteqarnissamut piginnaatitaanera, tapersiissutit tunniutereernerisa kingorna, maleruagassat nalinginnaasut malillugit pisoqalisassaaq. Piffissaliussaq atorunnaarsinneqarsinnaavoq, Unammilleqatigiinnermut Ataatsimiititaliap nammineerluni suliniuteqarnermigut imaluunniit naammagittaalliortoqarnera tunngavigalugu suliamik aallartitsinera aallarnerfigalugu aammalu ataatsimiititaliap aalajangiinissaata tungaanut. Unammilleqatigiinnermut Ataatsimiititaliaq kingusinaartumik akiliuteqarnermi il.il. ernialiussat pillugit inatsit malillugu, utertitsillugit akiliuteqarnermut atatillugu ernianik naatsorsuissaaq, ilanngullugu unammilleqatigiinnermik equtitsisumik tapersiissutit tunniunneqartup ernialersorneqarsinnaanera.

Imm. 5. Unammilleqatigiinnermut Ataatsimiititaliaq nalunaaruteqartoqareernerata kingorna nalunaaruteqarsinnaavoq, pissutsit Unammilleqatigiinnermut Ataatsimiititaliap ilisimasai malillugit pisortanit tapersiissutit imm. 2, nr. 1-imi aamma 2-imi pineqartunut ilaanngitsut, taamaattumillu peqqusissuteqarnissaaq tunngavissaqanngitsoq. Unammilleqatigiinnermut Ataatsimiititaliaq nalunaaruteqartarneq pillugu maleruagassanik aalajangersaasinnaavoq, ilanngullugu nalunaaruteqarnermi immikkut immersugassamik atuinissaaq pillugu maleruagassat.

§ 13. Namminersorlutik Oqartussat, kommunit il.il. inuussutissarsiornermik suliaqarnermik taamaattumik inatsimmi § 2, imm. 1-imi taaneqartumik ingerlataqarnerat unitseqqullugu Unammilleqatigiinnermut Ataatsimiititaliaq peqqusissuteqarsinnaavoq, suliaqarneq taanna:

- 1) niuerfimmi pineqartumi sunniuteqarluartumik unammilleqatigiinnissamut tunngaviusunik equtitsippat, imaluunniit equtitsisinnaappat, imaluunniit
- 2) sunniuteqarluartumik unammilleqatigiinnissamut tunngaviusut piunerannik imaluunniit ineriartortinneqarnerannik kigaalaqusersuippat, imaluunniit kigaalaqusersuinissatut atuussinnaappat.

Imm. 2. Inuussutissarsiornermik suliaqarneq inatsimmi tunngaveqartumik ingerlanneqarpas peqqusissuteqarneq nalunaarutigineqarsinnaanngilaq.

Imm. 3. Allatut aalajangiisoqanngippat peqqusissuteqarneq ingerlaannaq atuutilissaaq.

§ 14. § 13-imi maleruagassat atuupput suliffeqarfinnut, peqatigiiffinnut, aningaasaateqarfinnut il.il. pisortani oqartussaasut toqqaannartumik imaluunniit toqqaannanngitsumik piginnittuunermikkut, aningaasalersuinerimi peqataanermikkut, maleruagassani atuuttuni imaluunniit allatut ittumik immikkoortortamut aalajangiisuusumik sunniuteqarfigisaannut.

Kapitali 5

Suliffeqarfiit kattunnerannik nakkutiginninneq

§ 15. Kapitalimi uani aalajangersakkat atortinneqassapput kattunnerni, imaattuni:

- 1) suliffeqarfiit peqataasut ataatsimut ukiumut nunat tamalaat akornanni minnerpaamik 100 mio. kr.-inik kaaviiartitaqarsimappata,
- 2) suliffeqarfiit peqataasut minnerpaamik 2-it tamarmik immikkut nunat tamalaat akornanni ukiumut 50 mio. kr.-inik kaaviiartitaqarsimappata, aamma
- 3) suliffeqarfiit Kalaallit Nunaanni peqataasut ilaat 1 Kalaallit Nunaanni inissisimappat.

Imm. 2. Kattunneq suliffeqarfiup ataatsip arlalilluunniit ilaannik pisinikkut pilersimappat, tunisisumut imaluunniit tunisisunut tunngatillugu imm. 1-imi kaaviiartitanik naatsorsuinerimi taamaallaat kaaviiartitat pigisanut tiguneqartunut tunngasut eqqarsaatigineqassapput.

Imm. 3. Taamaattoq imm. 2-imi pineqartutut pisinerit marluk arlalilluunniit, inuit imaluunniit suliffeqarfiit taakkua akornanni ukiut marluk iluanni pisut, kattunnertut ataasiinnartut piffissami kingullermik akiliinerimi pisimasutut isigineqassapput.

Imm. 4. Naalakkersuisut Unammilleqatigiinnermut Ataatsimiititaliap oqaaseqaateqaqquneqareernerata kingorna imm. 1 malillugu kaaviiartitanik naatsorsuisarneq pillugu maleruagassat erseqqinnerusut aalajangersassavaat, ilanngullugu suliffeqarfinnut aningaasanik suliaqartunut kaaviiartitanut killissaliussat taaneqartut nalillit allat tunngavigalugit naatsorsorneqartassasut pillugu maleruagassat.

§ 16. Kattunneq Inatsisartut inatsisaanni matumani paasineqarpoq tassaasoq:

- 1) suliffeqarfiit marluk imaluunniit arlalillit maannamut imminnut attuumassuteqarsimanngitsut suliffeqarfinnut ataasiinnarmut ataatsimuulersinneqarpata, imaluunniit
- 2) inuk ataaseq imaluunniit inuit arlalillit, minnerpaamik suliffeqarfinnik ataatsimik imaluunniit suliffeqarfinnik ataatsimik arlalinnilluunniit nakkutigisaqareersut, piginneqataassutinik pisiortornikkut

imaluunniit pigisanik isumaqatigiissuteqarnikkut allatulluunniit suliffeqarfimmi ataatsimi arlalinniluunniit allani tamakkiisumik imaluunniit ilaannik toqqaannartumik imaluunniit toqqaannanngitsumik nakkutiginnilerpata.

Imm. 2. Suliffeqarfiit akornanni inuussutissarsiornermi suliasami suleqatigiinnissamik pilersitsineq, ataavartussamik tunngaveqartumik inuussutissarsiornermi suliasap atuuffinik tamaginnik namminersortumik isumaginniffiususaaq, imm. 1, nr. 2 malillugu kattunneruvoq.

Imm. 3. Inatsit manna malillugu suliffeqarfimmut nakkutiginninneq, pisinnaatitaaffitsigut, isumaqatigiissutitigut imaluunniit allatut iluseqartumik, ataasiakkaarlugit imaluunniit ataatsimoortillugit suliffeqarfiup ingerlanneqarneranut aalajangiisuusumik sunniuteqarnissamut periarfissaqalersitsisumik anguneqartarpoq.

Imm. 4. Imm. 1 naapertorlugu kattunneq pisanngilaq:

- 1) taarsigassarsiniartarfiit, suliffeqarfiit aningaasalersuisartut imaluunniit sillimasiisarfiit, pappiaqqanik aningaasanik nalilinnik nammineq akilikkaminnik imaluunniit allat akiligaannik aningaasanik nuussisarnermik niuernermillu ilaqartumik nalinginnaasumik suliaqartut, tuniniaaqinnissaaq siunertaralugu piginneqataassutininik suliffeqarfimmi pisiarisimasaminnik pigisaqarallartuuppata, suliffeqarfiup unammilleqatigiinnikkut pissusilersorneranik aalajangersaanissaaq siunertaralugu piginneqataassutininut taakkununnga atasumik taasisinnaatitaanerminnik atuinatik imaluunniit suliffeqarfiup taassuma imaluunniit taassuma pigisaanik imaluunniit piginneqataassutininik taakkununnga tamakkiisumik ilaannaasumilluunniit tuninissaanik piareersaanissaaq siunertaralugu taasisinnaatitaanermik taassuminnga atuillutik aammalu tunisineq pigisaqalernerup kingorna kingusinnerpaamik ukiup ataatsip qaangiunnerani tunisineq pilluni,
- 2) nakkutiginninneq inummit akiliisinnaajunnaartarneq il.il. pillugu inatsit malillugu suliffeqarfimmik pigisaqarsinnaasumik pigineqalerpat, imaluunniit
- 3) imm. 1, nr. 2-imi aningaasanik nuussinerit taaneqartut ingerlatseqatigiiffinnik piginnittunit tamatuma saniatigut namminersorlutik inuussutissarsiornermi suliaqarnermik ingerlatsinatik taamaallaat suliffeqarfinnik allanik piginnittuusunit ingerlanneqarpata, taamaattoq taasisinnaatitaanerit piginneqataassutininut atasut pigisaat, pingaartumik suliffeqarfinni piginneqataassuteqarfiusuni pisortatut oqartussaasussani aamma nakkutilliinermik oqartussaasussani ilaasortassanik toqqaanermut atatillugu, aningaasaliinerit taakkua tamakkiisumik nalingannik attassiinnarnissamut taamaallaat atorneqarnissaat aammalu toqqaannartumik imaluunniit toqqaannanngitsumik suliffeqarfinni taakkunani unammilleqatigiinnikkut pissusilersornermik aalajangiinissamut atorneqannginnissaat killilersuutigineqarluni.

Imm. 5. Unammilleqatigiinnermut Ataatsimiititaliap piumasaqartoqarneratigut imm. 4, nr. 1-imi piffissaliussaaq sivitsorsinnaavaa, taarsigassarsiniartarfiup, suliffeqarfiup aningaasalersuisartup imaluunniit sillimasiisarfiup uppersarsarpagu, piffissaliussatut aalajangersagaasup iluani tunisinissamut naleqquttumik periarfissaqarsimangitsoq.

§ 17. Kattunneq Inatsisartut inatsisaanni matumani pineqartunut ilaasoq, kattunnissamut isumaqatigiissutit atsiorneqareernerata kingorna, tigusinissamut neqeroorutip tamanut ammasumik saqqummiunneqareernerani imaluunniit piginneqataassutaasoq nakkutiginnitsitsisoq pisiarinqareeraangat aammalu taassuma piviusunngortinneqannginnerani Atuisartoqarnermut Unammilleqatigiinnermullu Aqutsisoqarfimmut nalunaarutigineqassaaq.

Imm. 2. Atuisartoqarnermut Unammilleqatigiinnermullu Aqutsisoqarfiup kattunnissaq nalunaarutigineqarsimasooq tamanut ammasumik saqqummiussinnaavaa. Tamanut ammasumik saqqummiussinermi ilaassapput kattunnermi peqataasut atii, kattunnerup suussusaa aammalu aningaasaqarnikkut suliassaqaarfiit kalluarneqartut.

Imm. 3. Naalakkersuisut Unammilleqatigiinnermut Ataatsimiititaliamut oqaaseqaateqaqqusereernermit kingorna kattunnersut nalunaarutiginnittarneq pillugu maleruagassanik erseqqinnerusunik aalajangersaasinnaapput, ilanngullugit nalunaarutiginninnermi immersugassanik immikkut ittunik atuinnissaq pillugu maleruagassat, aammalu kattunnissamik nalunaarutiginninnermik isertuussassaangitsutut ilusilimmik nassiussisarneq pillugu.

§ 18. Naalakkersuisut kattunnersut nalunaarutiginninnermut akiliummik aalajangersaasinnaapput.

Imm. 2. Akiliutit nalunaarutiginninnermut peqatigitillugu Atuisartoqarnermut Unammilleqatigiinnermullu Aqutsisoqarfimmut akilerneqassapput. Akiliinnermut uppersarsaat nalunaarutiginninnermut ilanngunneqassaaq. § 23, imm. 1-imi piffissaliussaq ulloq aqutsisoqarfiup nalunaarutiginninnerup tamakkiisup saniatigut akiliummik akiliisimanermit uppersarsaammik tiguserata aallarnerfigalugu aallartissaaq.

Imm. 3. Kattunneq nalunaarutigineqarsimasutut isigineqassanngilaq, imm. 2 malillugu piumasaqaateqartoqaraluartoq akiliut akilerneqarsimanngippat.

Imm. 4. Imm. 2 malillugu akiliummut akiliutaareersoq utertillugu akilerneqassanngilaq, imaattoqarsimanngippat:

- 1) aningaasanik nuussineq nalunaarutigineqartoq nalunaarutigineqartussaataangitsooq,
- 2) nalunaaruteqarnerup tamakkiisuunnissaa sioqqullugu nalunaaruteqarneq tunuartinneqartoq, imaluunniit
- 3) § 22, imm. 1 imaluunniit 7 malillugu aalajangiisoqarnissaa sioqqullugu nalunaaruteqarneq tunuartinneqartoq, aammalu tunuartsinnermut oqartussaasup allap suliffeqaarfiit kattunnersut nalunaarutiginninnermi ilaasut ataatsimoortilernissaannut itigartitsisimaneranik pissuteqartoq.

§ 19. Unammilleqatigiinnermut Ataatsimiititaliaq aalajangiissaaq kattunneq akuerineqarsinnaanersoq imaluunniit inerteqquteqarfigineqassanersoq, taamaattoq takuuk imm. 7.

Imm. 2. Kattunneq unammilleqatigiinnerup sunniuteqarluarnissaanik, pingaartumik pilersitsinerup malitsigisaanik imaluunniit pissaaneqarnerusumik inissisimanermit nukittortitsisumik, annertuumik akimmisaartitsinngitsooq akuerineqassaaq. Kattunneq unammilleqatigiinnerup sunniuteqarluarnissaanik, pingaartumik pilersitsinerup malitsigisaanik imaluunniit pissaaneqarnerusumik inissisimanermit nukittortitsisumik, annertuumik akimmisaartitsisoq inerteqquteqarfigineqassaaq.

Imm. 3. Suliassanut suleqatigiilernermit pilersitsisoqartillugu § 16, imm. 2 malillugu kattunnersumik, aammalu suliffeqaarfiit imminnut attuumassuteqaangitsut unammilleqatigiinnermi pissusilersornerisa ingerlaannarnissaannik siunertaqartumik imaluunniit ataqatigiissitsisumik, ataqatigiissitsineq taanna aningaasanik nuussineq akuerineqarsinnaanersoq aalajangersinnaajumallugu § 6, imm. 1-imi aamma § 8, imm. 1-imi tunngavissarititaasut malillugit nalilersorneqassaaq.

Imm. 4. Imm. 3 malillugu nalilersuinnermi Unammilleqatigiinnermut Ataatsimiititaliap pingaartumik mianerissavai:

- 1) ataatsikkut suliffeqaarfiit marluk amerlanerusulluunniit pilersinneqartut, suliassanut suleqatigiilernermit

pineqartumisuulli malunnarluartumik niuerfimmiilernersut imaluunniit niuerfimmu tassunga imaluunniit niuerfimmu tassunga assingusumut niuerfimmu tassunga qanittumik atasumut tunngatillugu niuerfimmi suliaqarnerup siornaniilernersut imaluunniit kingornaniilernersut, aamma

2) suliffeqarfiit peeqataasut suliassanut suleqatigiilernermik pineqartumik pilersitsinermik toqqaannartumik pissuteqartumik ataqatigiilernermi, nioqutissat imaluunniit kiffartuussissutit pineqartut annertunersaannut unammilleqatigiinnissamut akornusiinissamut periarfissaqalernersut.

Imm. 5. Kattunneq Inatsimmi matumani pineqartunut ilaasoq, nalunaarutigineqareersimanngikkuni imaluunniit Unammilleqatigiinnermut Ataatsimiititaliaq imm. 1 naapertorlugu akuersissuteqareersimanngippat, piviusunngortinneqassanngilaq. Tamanna kattunneq piaartumik Atuisartoqarnermut Unammilleqatigiinnermullu Aqutsisoqarfimmu nalunaarutigineqarpat aammalu pisisup taasisinnaatitaanerit pappiaqqanut nalilinnut pineqartunut atasut atunngippagit imaluunniit aningaasaliinermi nalingata tamakkiisup pigiinnarnissaa siunertarlugu aammalu Unammilleqatigiinnermut Ataatsimiititaliaq immikkut ittumik saneqqutsinissamut akuersissuteqarneratigut, takuuk imm. 6, tamanut ammasumik tigusinissamut neqeroorummik imaluunniit pappiaqqani nalilinni tulleriissaartumik aningaasanik nuussinermik piviusunngortitsinissamut akornutaanngilaq, ilanngullugit taamaattut, allanut pappiaqqanut nalilinnut allanngortinneqarsinnaasut, niuerfimmi aningaasanut niuerfittut ittuni tunineqarsinnaasut, taamaaliornikkut tuniniaasunit assigiinngitsunit nakkutiginninnermik pisisoqartarluni, takuuk § 16.

Imm. 6. Unammilleqatigiinnermut Ataatsimiititaliaq imm. 5-imi aalajangersakkap saneqqunneqarnissanut immikkut ittumik akuersissuteqarsinnaavoq aammalu tassunga atatillugu unammilleqatigiinnerup sunniuteqarluartuunissaata qulakkeerneqarnissaa siunertarlugu atugassarititaasussanik ilanngussisinnaalluni imaluunniit peqqusissuteqarsinnaalluni.

Imm. 7. Atuisartoqarnermut Unammilleqatigiinnermullu Aqutsisoqarfiup imm. 1 apeqquaatinnagu, suliassanik suliarinninneq pisariillisagaasoq malillugu kattunneq akuerisinnaavaa, aqutsisoqarfik isumaqaruni kattunneq paasissutissat pigineqartut tunngavigalugit aqutsisoqarfiup tungaaniit akerliliissuteqarnissamut pissutissaqalersitsinngitsoq.

§ 20. Nalunaarutiginninnerup tamakkiisup tighnerata kingorna kingusinnerpaamik ulluinnaat 40-it qaangiunneranni, taamaattoq takuuk § 18, imm. 2, kattunneq akuerineqarsinnaanersoq aalajangiisoqassaaq, ilanngullugu kattunneq suliassanik suliarinninneq pisariillisagaasoq malillugu akuersissuteqarfigineqarsinnaanersoq. Piffissaliussap taassuma iluani kattunneq immikkut misissuiffigineqassanersoq pillugu aalajangiisoqarsinnaavoq.

Imm. 2. Kattunnerup immikkut misissuiffigineqarnera aallartinneqarpat, takuuk imm. 1, oqaaseqatigiit aappaat, imm. 1-imi piffissaliussap taaneqartup naareernerata kingorna kingusinnerpaamik ulluinnaat 90-it qaangiunneranni kattunnissaq pillugu akuersissuteqarnissaq imaluunniit inerteqquteqarnissaq pillugu aalajangiisoqassaaq.

Imm. 3. Suliffeqarfiup peqataasup ataatsip arlallilluunniit neriorsuut nutaaq imaluunniit iluarsisaq siunnersuutigippasuk, imm. 2-imi piffissaliussaq ulluinnaat 20-it tikillugit sivitsorneqassaaq. Piffissaliussaq taamaallaat sivitsorneqassaaq piffissami neriorsuummik tunniussiffiusumi imm. 2 malillugu aalajangiisussaagaluarnermit ulluinnaat 20-init ikinnerusut sinnerussimappata, taamaallunilu neriorsuut nutaaq imaluunniit iluarsisaq tunngavigalugu kattunnermik nalilersuinissamut ataatsimut katillugit ulluinnaat 20-iullutik.

Imm. 4. Aammattaaq imm. 2-imi piffissaliussaq Unammilleqatigiinnermut Ataatsimiititaliap aalajangiineratigut sivitsorneqarsinnaavoq, tunngavissarititaalluni suliffeqarfik imaluunniit suliffeqarfiit nalunaarutiginnissimasut tamatuminnga piumasaqarsimassasut imaluunniit taamaattoqarnissaanik akuersisimallutik. Sivitsuineq ulluinnarnit 20-init sivisunerusinnaanngilaq.

Imm. 5. Piffissaliussat imm. 1-4 malillugit piffissaliunneqartut iluanni aalajangiisoqarsimanngippat, tamanna kattunnermik akuersilluni aalajangiisimanertut isigineqassaaq.

§ 21. Unammilleqatigiinnermut Ataatsimiititaliap kattunnermut akuersissuteqarnermut, takuuk § 19, imm. 2, atugassarititaasunik ilanngussisinnaavoq imaluunniit peqqusissuteqarsinnaalluni, ilanngullugu suliffeqarfiit peqataasut kattunnerup ajoqutaasumik sunniuteqarnissaa peerniarlugu neriorsuummik Unammilleqatigiinnermut Ataatsimiititaliamut tunniussimasaminnik naammassinninnissaasa qulakkeerneqarnissaa.

Imm. 2. Atugassarititaasut imaluunniit peqqusissuteqarneq ilaatigut tassaasinnaapput suliffeqarfiit peqataasut:

- 1) suliffeqarfik, suliffeqarfiup ilaa, pigisat imaluunniit allat piginnittut soqutigisaat tunissagaat,*
- 2) allanik isersinnaasoqassasoq nassuerutigissagaat imaluunniit*
- 3) allanik sunniuteqarluartumik unammilleqatigiinnermik siuarsaasinnaasunik iliuuseqassasut.*

Imm. 3. Kattunnerup akuersissuteqarfigineqareernerata kingorna Unammilleqatigiinnermut Ataatsimiititaliap suliffeqarfiit peqataasut ataatsimiititaliamut neriorsuutaannik piffissaq eqqorlugu aammalu eqqortumik naammassinninnissaasa qulakkeernissaannut pisariaqartumik peqqusissuteqarsinnaavoq, takuuk imm. 1.

§ 22. Unammilleqatigiinnermut Ataatsimiititaliap kattunnermik akuersissuteqarneq utertissinnaavaa:

- 1) Unammilleqatigiinnermut Ataatsimiititaliap aalajangiinera annertuumik annertussusilimmik paasissutissanik, suliffeqarfiit peqataasut ataatsip arlallilluunniit pisuussutigisaanik, eqqunngitsunik uukapaatitsisunillu tunngaveqarsimappat, imaluunniit*
- 2) suliffeqarfiit peqataasut atugassarititaasumik imaluunniit peqqusissutaasumik malinninngippata, takuuk § 21, imm. 1.*

§ 23. Unammilleqatigiinnermut Ataatsimiititaliap § 19, imm. 1 malillugu kattunnermik piviusunngortinneqareersimasumik inerteqquteqarnissaq pillugu aalajangiinermigut, suliffeqarfiit imaluunniit pigisat tiguneqartut imaluunniit kattussimasut aggulunnissaannik imaluunniit ataatsimoorullugu nakkutiginninnerup imaluunniit allap suulluunniit sillimaniarnermut maleruagassap unitsinneqarnissaanik peqqusissuteqarsinnaavoq, sunniuteqarluartumik unammilleqatigiinnermik pilersitseqqissinnaasussamik.

Kapitali 5 a

Suliaqarfiit aalajangersimasut siunnerfigalugit elektroniskiusunik attaveqaaqatigiinnermut aamma kiffartuussinnermut atatillugu unammilleqatigiinnermik aqutsineq

Internetimut appakaaffissaqartitsineq aamma peqatigiilluni ataatsimut atuisitsisinnaatitsineq pillugit ataatsimut aalajangersakkat

§ 23 a. Attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut peqatigiillutik ataatsimut atuisitsisinnaatitsineq pillugu akunnerminni isumaqatigiissusiornissaq pisussaaffigaat attaveqaqatigiissutit elektroniskiusut kikkunnut tamanut neqeroorutigineqarsinnaanissaat siunertaralugu, taamaalilluni kiffartuussissutit taamaattut Kalallit Nunaanni tamarmi neqeroorutigisinnaaqqullugit aamma unammilleqatigiit neqeroorutigisaat suleqatigiissinnaaqqullugit.

Imm. 2. Atuisartoqarnermut Unammilleqatigiinnermullu Aqutsisoqarfik pisussaaffiliisinnaavoq, tamanna pisariaqaraangat, atuisut attaveqaqatigiissutini ataasiakkaani atassuserneqarnissaannik qularnaarukkumallugit imaluunniit attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartunut, atuisup ataatsip amerlanerusulluunniit iserfigineqarsinnaanerannik paarsisuusunut, ilanngullugu unammilleqatigiit ataqatigiissaarutaasa ataatsimut suleqatigiissinnaalersinnissaat, unammilleqatigiit neqeroorutigisaasa suleqatigiissinneqarnissaat qularnaarumallugit.

§ 23 b. Internetimut appakaaffissaqartitsineq aamma peqatigiilluni ataatsimut atuisitsisinnaatitsineq isumaqatigiissutit imminut akilersinnaasunik atugassarititaasut iluanni aalajangersarneqartassapput.

Imm. 2. Naak imm. 1 atuukkaluartoq attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut, § 23 a, imm. 2 imaluunniit § 23 i naapertorlugit pisussaaffilerneqarsimasut, attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik kikkunnut tamanut neqerooruteqartartut allat internetimut appakaaffissaqartitsinermik aamma peqatigiilluni ataatsimut atuisitsisinnaatitsinermik neqerooruteqassapput naammassisassat piumasallu neqerooruteqartumut pisussaaffigineqarsimasunut naapertuuttunik.

§ 23 c. Attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartut internetimut appakaaffissaqartitsineq imaluunniit ataatsimut ingerlaarneq pillugit isumaqatigiinniarnert sioqqullugit, ingerlanneranni kingornaluunniit attaveqaqatigiissutininik imaluunniit kiffartuussissutininik elektroniskiusunik ataqatigiissaakkanik neqerooruteqartartunit allanit paasissutissanik tigusaqartut taamaallaat paasissutissat pissarsiarisani siunertaasumut tunniunneqarnerat naapertorlugu atorsinnaavai, aammalu sukkulluunniit paasissutissat taakkua tigusimasani isertuuttussaallugit.

Imm. 2. Paasissutissat tigusimasat allanut ingerlatseqqinneqassanngillat, taamaaliornikkut unammilleqatigiinnermi iluaqutissarsisinnaasumut, tamatumani aamma immikkoortortanut allanut, ingerlatseqatigiiffinnut allequtaasunut imaluunniit piginneqatigisanut.

Internetimut appakaaffissaqartitsinermi teknikkikkut aqutsineq

§ 23 d. Naalakkersuisut Atuisartoqarnermut Unammilleqatigiinnermullu Aqutsisoqarfimmit oqaaseqaatinik piniareernerme kingornatigut ersarinnerusunik malittarisassiorsinnaavoq, attaveqaasersuisartut niuerfimmi annerpaamik tiggummisuusut, internetimut appakaaffissaqartitsinissamik pisussaaffiligaasut, takuuk § 23 j, aamma attaveqaqatigiissutininik imaluunniit

kiffartuussissutininik elektroniskiusuninik ataqtigigiissaakkanik kikkunnut tamanut neqerooruteqartartut internetimut appakaaffissamik taamaattumik atuisuusut, ingerlatsinermut atatillugu teknikkikkulluunniit piomasaaqatinik naammassinnittassapput, tamanna pisariaqaraangat attaviit ingerlanneqarnerisa nalinginnaasuunissaasa qularnaarneqarnissaannut.

Unammillernermi atugassarititaasuninik misissuisarnerit

§ 23 e. Atuisartoqarnermut Unammilleqatigiinnermullu Aqutsisoqarfiup akuttoqatigiissaakkamik nalunaarasuartaateqarnermi unammilleqatigiinnermi pissutsit misissuiffigisarpai (niuerfimmi misissuineq), pisariaqartitsineq nalilersorsinnaajumallugu, § 23 i-lu naapertorlugu pisussaaffiliinissamut pisariaqartitsineq nalilersorsinnaajumallugu.

Imm. 2. Atuisartoqarnermut Unammilleqatigiinnermullu Aqutsisoqarfiup niuerfimmi misissuinerusimasut nutarsartarpai, niuerfusuni pissutsinilu atuuttuni pisariaqarneranik nalileereernermi.

Imm. 3. Neqerooruteqartartut niuerfimmi annerpaamik tigummisuusut pisussaaffiligaasullu, takuuk § 23 i, aaqqissuussaannikkut allannguinerit pisussaaffiliunneqarsimasunut annertuumik pingaaruteqartut pillugit Atuisartoqarnermut Unammilleqatigiinnermullu Aqutsisoqarfik ilisimatittassavaat.

Niuerfusuninik killilersuisarneq

§ 23 f. Niuerfusuninik misissuisarnernut atatillugu, takuuk § 23 e, Atuisartoqarnermut Unammilleqatigiinnermullu Aqutsisoqarfiup niuerfusut killissaat nalunaarsortassavai, nunarsuarmiut akornanni periaatsit pitsaanerpaat tunngavigalugit, Kalaallit Nunaanni pissutsinut naleqqussarlugit.

Niuerfinnik misissuineq

§ 23 g. Niuerfinnik misissuisarnernut atatillugu, takuuk § 23 e, Atuisartoqarnermut Unammilleqatigiinnermullu Aqutsisoqarfiup niuerfinnik nalilersuineq ingerlattarpaa, § 23 f-imut naapertuuttumik killiligaasoq, nalilersorsinnaajumallugu niuerfinni taakkunanani piviusumik unammilleqatigiittoqarnersoq.

Neqerooruteqartartumik niuerfimmi annerpaamik tigummisumik toqqaaneq

§ 23 h. Niuerfinnik misissuinerup, takuuk § 23 g, ersersippagu piviusumik niuerfusumi unammilleqatigiittoqanngitsoq, taava Atuisartoqarnermut Unammilleqatigiinnermullu Aqutsisoqarfiup niuerfimmi pineqartumi annerpaamik tigumminnittumik attaveqatigiissutininik imaluunniit kiffartuussissutininik elektroniskiusuninik ataqtigigiissaakkanik neqerooruteqartartoq ataaseq amerlanerusulluunniit toqqassavaa imaluunniit toqqassavai.

Imm. 2. Niuerfimmi ingerlatsisuusoq annertuumik ingerlatsivimmi tigumminnittuusutut isigineqassaaq, imm. 1 naapertorlugu, neqerooruteqartartoq annertuumik tigumminnittoq kisimiilluni imaluunniit neqerooruteqartartut allat peqatigalugit, aningaasaqarnikkut ima nukittutigisumik inissisimaguni unammillertit allat kiffartuussallu apeqqutaatinngit iliuuseqarsinnaassuseqarluni.

Imm. 3. Niuerfimmi aalajangersimasumi neqerooruteqartartoq imaluunniit niuerfimmi

neqerooruteqartartut annerpaamik tigumminnittut toqqarneqarpat, takuuk imm. 1, Atuisartoqarnermut Unammilleqatigiinnermullu Aqutsisoqarfik tamatuma ilutigisaanik neqerooruteqartartoq taanna niuerfimmi assingusumi annerpaamik neqerooruteqartartussatut toqqarsinnaavaa, niuerfimmi ataatsimi inissisimaneq niuerfiup aappaanut nuunneqarsinnaara niuerfiusut taakkua marluk imminnut attaveqarnerisa periarfissaqartippagu, taamalu neqerooruteqartartup taassuma niuerfinni inissisimanera annertusaqqissinnaallugu nukittorsaqqillugulu.

Imm. 4. Niuerfimmik misissuinerup, takuuk § 23 g, ersersippagu niuerfimmi pineqartumi piviusumik unammilleqatigiittoqartoq, imaluunniit neqerooruteqartartoq niuerfimmi annerpaamik tigumminnittuujunnaarsimappat, taava Atuisartoqarnermut Unammilleqatigiinnermullu Aqutsisoqarfiup pisussaaffiit tamaasa atorunnaarsissavai, immikkoortoq una naapertorlugu, imaluunniit immikkoortoq una naapertorlugu malittarisassiaasut naapertorlugit niuerfimmik annerpaamik tigumminnittuusimasumut pisussaaffiliunneqarsimasut, niuerfimmi pineqartumi annerpaamik tigumminnittuusimaneranni pisussaaffiliussaasut aqunniarlugit.

Neqerooruteqartartut niuerfimmi annerpaamik tigummisuusut malittarisaliunneqarneranni pisussaaffiit

Niuerfimmik aalajangiinerit

§ 23 i. Aalajangiinerni § 23 h, imm. 1 naapertorlugu, Atuisartoqarnermut Unammilleqatigiinnermullu Aqutsisoqarfik neqerooruteqartartut niuernermik annerpaamik tigumminnittuusut, takuuk § 23 h, ataatsimik arlaqartunilluunniit pisussaaffiliissaaq.

Imm. 2. Atuisartoqarnermut Unammilleqatigiinnermullu Aqutsisoqarfiup aalajangikkani ataasiakkaani pisussaaffiliunneqartuni annertussusiusussanik aamma taakkua imarisassaannik aalangersaasassaaq. Pisussaaffinnut imm. 1-imi pineqartunut ilaasinnaapput:

- 1) Internetimut appakaaffissaqartitsineq, takuuk § 23 j.
- 2) Assigiinngisitsinnginnissaaq, takuuk § 23 k.
- 3) Akimut ersittuutitsinissaaq, takuuk § 23 l.
- 4) Naatsorsuutit immikkoortukkuutaartumik aaqqissuussaanissaat, takuuk § 23 m.
- 5) Akinik nakkutillineq, takuuk § 23 n.
- 6) Aaqqissuussamik immikkoortitseqqanissaaq, takuuk § 23 o.

Imm. 3. Atuisartoqarnermut Unammilleqatigiinnermullu Aqutsisoqarfik pisuni immikkut ittuni niuerfimmik annerpaamik tigumminnittunut allanik pisussaaffiliisinnaavoq, imm. 2-mi allattukkat saniatigut.

Imm. 4. Imm. 3 apeqquatainnagu Atuisartoqarnermut Unammilleqatigiinnermullu Aqutsisoqarfik neqerooruteqartartut niuerfimmi annerpaamik tigumminnittut ingerlatsiviisa annikitsut malittarisaliunneranni pisussaaffinnik allanik atugassiissuteqarsinnaavoq, pisussaaffiit imm. 2-mi eqqaaneqartut unammilleqatigiinnermi ajornartorsiummik § 23 g naapertorlugu paasineqartumik aaqqiinissamut naleqqutinngitsutut nalilerpagu.

Imm. 5. Aalajangiinermi imm. 1, 3 imaluunniit 4-mi pineqartumut atatillugu Atuisartoqarnermut Unammilleqatigiinnermullu Aqutsisoqarfiup aalajangissavaa attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik neqerooruteqartartut tamatumunga

kalluarneqartut qanoq ilisimatinneqassanersut. Neqerooruteqartartut taakkua piffissaagallartillugu piffissaqarluartumik tamanna pillugu ilisimatinneqartassapput.

Internetimut appakaaffissaqartitsinermik pisussaaffeqarnej

§ 23j. Internetimut appakaaffissaqartitsinermik pisussaaffeqarnej ima paasineqassaaq neqerooruteqartartut niuerfimmi annerpaamik tigumminnittuusut internetimut appakaaffissaqartitsinermik piviusumik imaluunniit piviusuusaartumik neqerooruteqartartup internetimi immikkoortuinut, kiffartuussinerinut assigisaannillu ingerlataanut neqerooruteqartassasut. Tassunga atatillugu neqerooruteqartartoq Atuisartoqarnermut Unammilleqatigiinnermullu Aqutsisoqarfimmit internetimut appakaaffissaqartitsinissaq taamaattulluunniit pillugit isumaqatigiissutit allannguuteqartinnissaannik noqqaassutit naleqquttut akuerinissaannut pisussaaffilerneqarsinnaavoq. Pisussaaffik ilaatigut makkuninnga imaqaarsinnaavoq:

- 1) Internetimi immikkoortunut ingerlatanullu, ilanngullugit internetimi immikkoortunut atunngitsunut, atuisartuutit attaviinut pisussaaffilersugaanngitsumik pisinnaaneq aamma atuisartuutit attaviinik tuniniaaqqissinnaanermik neqerooruteqarsinnaanermik pisinnaatitsineq.
- 2) Attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut atuisinnaanermut qinnuteqartut pimoorussillutik isumaqatiginninniaqatigisassagaat.
- 3) Atortorissaarutitut siusinnerusukkut attaviliivigineqarsimasunut attavinnik atortitsiinnarnissanut.
- 4) Kiffartuussinernik assigiinngitsunik annertuukkaartumik pingajuusunut neqerooruteqartarnej niuerutigeqqitassatut.
- 5) Teknikkikkut saqqumisup ilusaanut, protokollinut imaluunniit teknikkikkut atortorissaarutitut allanut killeqanngitsumik attaveqarnissanut neqerooruteqartarnej, kiffartuussissutaasut imaluunniit kiffartuussissutaasunut assingusut unammilleqatigiit neqeroorutigisaat suleqatigiissinnaanissaannut pingaaruteqartunut.
- 6) Ataatsimut ineqarnissamik neqerooruteqarnej, ataatsimut ineqarnertut aaqqissuussisinnaanermik imaluunniit allatigut ataatsimut atortorissaarutinik atueqatigiinnissamik neqerooruteqarnerit, tamatumani aamma illuutinik ataatsimoorussilluni atuinissamik, illunut aqqutinik ataatsimut atuinissamik, illuni kabelinik, napparutinik, antenninik, napasulianik, allanillu iluaqusersuutinik, kabelit ledningillu aqqaannik kabelinullu itersalianik aamma skavinnik atueqatigiinnissamik neqerooruteqartarnerit.
- 7) Kiffartuussinernik aalajangersimasunik neqerooruteqartarnissaq, atuisartut akornanni internetip attaviullu suleqatigiissinnaanissaasa qularnaarnissaannut pisariaqartunik, tamatumani aamma internetikkut kiffartuussissutit silatuut imaluunniit mobile netikkut atuisuuffigisap isumaqatigiissuteqarfigisimasaasa attaveqaataasa aqqaannik atuinernik.
- 8) Ingerlatsinernut ikorfartuutaasunik aaqqissuussinernik software-nilluunniit assigisaannik atuinissamut neqerooruteqartassalluni, unammilleqatigiinnermik piviusumik ingerlatsinissamut pisariaqartunik.
- 9) Attaveqaatit assigiinngitsut imaluunniit internetikkut ingerlatsiviit tigussaasunik isumaliortaatsikkulluunniit naleqquttunik ataatsimut kattunneqarnissaannik neqerooruteqassalluni.
- 10) Kiffartuussinernik attuumassuteqartunik atuisinnaanermut neqerooruteqassalluni, soorlu kinaassutsimut, nunap immikkoortuani sumiinnermik peqataanermillu takutitsisinnaasunut.

Imm. 2. Internetimut appakaaffissaqartitsinermut pisussaaffinnik aalajangersaasarnerni

Atuisartoqarnermut Unammilleqatigiinnermullu Aqutsisoqarfiup ingammik isiginiassavai;

- 1) niuerfimmi ineriartornerup ingerlasup teknikkikkut aningaasarsiornikkullu ingerlatsiviit imminnut unammillertut atornissai imaluunniit ikkunnsai ajornartinnginneraa, internetimut appakaaffissaqartitsinermik aamma ataatsimut ingerlaarnermut aaqqiissutit qanoq ittuunerat qajassuullugu,
- 2) internetimut appakaaffissaqartitsineq neqeroorutigineqartoq tigussaasumik periarfissaqarnerseq tiguisinnaassuseq pigineqartoq eqqarsaatigalugu,
- 3) ingerlatsivimmik piginnittup pilersitsinissamut aningaasaliissutinik qanoq annertutigisunik aallarniuteqartariaqarnerseq, pisortat aningaasaliissutigisimasaannut aamma nalorninaatinut tamatumunga atasunut sanilliullugu,
- 4) ungasinnerusq eqqarsaatigalugu killilersugaanngitsumik unammilleqatigiinnerup qularnaarneqarnissaanut pisariaqartitsineq, ingammik nunap iluani atortorissaarutit aningaasarsiornikkut akilersinnaasumik unammilleqatigiinnermik tunngaveqartoq, aamma
- 5) pisinnaatitaaffusinnaasut naleqquttut silatuumillu aaqqiissuussat nunarsuarmiullu kiffartuussinertigut neqeroorutaat.

Assigiinngisitsinnginnissamut pisussaaffik

§ 23 k. Assigiinngisitsinnginnissamut pisussaaffittut paasineqassaaq neqeroorutinik annerpaanik tigummisuusut qularnaassagaat pisussaaffiit, pissutsit assigisaanni attaveqatigiissutinik imaluunniit kiffartuussissutinik elektroniskiusunik ataqatigiissaakkanik neqerooruteqartartut allat neqeroorutaasartut assigisaannik niuruteqartut, atugassarititaasut assigisaasa iluanni aamma akit assigisaasa iluanni, aammalu kiffartuussinernik neqerooruteqartassasut atugassarititaasut assigisaasa iluanni, akit pitsaassutillu assigisaannik, kiffartuussinertut neqerooruteqartartumit allamit atortinneqartutulli, taassuma ataaniittutut ingerlatseqatigiiffutaanut imaluunniit suleqataanut aamma.

Imm. 2. Imm. 1-imi pisussaaffimmut aamma ilaapput pisut, kiffartuussinernik niuerfimmi annerpaamik tigummisuusup, imminnut neqeroorutigisaani, ingerlatseqatigiiffimmut allequtaasutut pigisaminut suleqatigisaminulluunniit neqeroorutigisaani, nioqqutinit assigiinngitsunit katitigaasuni, aamma pisuni kiffartuussinerit assingusut neqeroorutigineqarfigisaanni pineqartunut atatillugu, imaluunniit nioqqutini assigiinngitsuni immikkuualuttortaasutut ilaaffigisaanni.

Imm. 3. Neqerooruteqartartoq annerpaamik tigummisuusoq akimut ersittuutitsinissamik pisussaaffilerneqarsimasuni, neqerooruteqartartoq pisussaaffigiligaalluni nioqqutissanik nutaanik, pioreersunillu allannguumaarnissanik tamanut paasissutissiissuteqartarnissamik, takuuk § 23 1, taava Atuisartoqarnermut Unammilleqatigiinnermullu Aqutsisoqarfik niuernermut tunngatillugu aalajangiinnermini piumasaqarsinnaavoq nioqqut ataatsimoortoq nutaaq imaluunniit allangortinneqartoq, internetimut appakaaffissaqartitsinermik pisussaaffilikkamut ilaasoq, takuuk § 23, j, piffissami aalajangersimasumi suleqatit akornanni avammulluunniit nioqqutigineqassanngitsoq.

Akimut ersittuutitsinissamut pisussaaffik

§ 23 l. Akimut ersittumik ingerlatsinissamut pisussaaffeqarneq paasineqassaaq neqerooruteqartartut annerpaamik tigummisuusut paasissutissanik aalajangersimasunik tamanut

saqqummiussaqaartartussaanerattut.

Imm. 2. Neqerooruteqaartartoq annerpaamik tigummisuusoq assigiingisitsinnginnissamik pisussaaffigiligaasimappat, takuuk § 23 k, Atuisartoqarnermut Unammilleqatigiinnermullu Aqutsisoqarfup neqerooruteqaartartoq peqqusinnavaa neqeroorummik nalinginnaasumik taaneqaartumik tamanut saqqummiinissamik, naammaginantumik qilertaanngitsumik attaveqaqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqaartartut allat ingerlatsivinnik internetimut appakaaffissaqaartitsineranut kissaatigineqaartumut pisariaqanngitsunik akiliisariaqannginnissaannik qularnaarnissaanut, tamanullu saqqummiussami nalunaarsorneqarsimassallutik kiffartuussissutit ataasiakkaat, taakkunungalugu tunngatillugu atugassarititaasut piumasaqaatillu, tamatumani aamma akigititat.

Imm. 3. Neqerooruteqaartartoq annerpaamik tigumminnittoq pisussaaffilerneqarsimappat § 23 j, imm. 1, nr. 1-imi pineqaartutut, atuisut atassutaannit qilertaanngitsut atorlugit internetimut appakaaffissaqaartitsilerluni, tamanna pillugu neqeroorut nalinginnaasoq kikkunnut tamanut saqqummiunneqassaaq.

Imm. 4. Neqerooruteqaartartut annerpaamik tigummisaqaartut neqeroorutiminnik nalinginnaasunik tamanut saqqummiussisarnissamik pisussaaffiligaasut imm. 2-mi aamma 3-mi nalunaarneqaartutut, kingusinnerpaamik tamanut saqqummiussinermut atatillugu neqeroorut nalinginnaasoq Atuisartoqarnermut Unammilleqatigiinnermullu Aqutsisoqarfimmut nassiutissavaa.

Imm. 5. Neqeroorut nalinginnaasoq minnerpaamik pissutsinut niuerfimmi aalajangiinerni taaneqaartunik imaqaassaaq, tak. § 23 i.

Naatsorsuutini immikkoortitsisarnissamut pisussaaffik

§ 23 m. Naatsorsuutitsigut immikkoortukkaartumik aaqqissuussinissamut pisussaaffeqarneq paasineqassaaq neqerooruteqaartartut annerpaamik tigumminnittuusut internetimut appakaaffissaqaartitsineranut tunngatillugu suliat aalajangersimasut immikkut naatsorsuusiornissai pisussaaffigigaat.

Imm. 2. Nipangiussisussaatitaanermik malittarisassat, pisortani sulianik ingerlatsisarnermut inatsit aamma inummut tunngasunik paasissutissanut inatsit unioqqutinnagit Atuisartoqarnermut Unammilleqatigiinnermullu Aqutsisoqarfik naatsorsuutitut tunngasumik paasissutissat, tamatumanilu aamma isertitat, tamanut takusassiarisinnaavai.

Akinik nakkutilliinermut pisussaaffik

§ 23 n. Akinik nakkutillisussaanermik pisussaaffittut paasineqassaaq pisussaaffik neqerooruteqaartartut annerpaamik tigumminnittuusut akinik aalajangersaasarnissamut piumasaqaatinik naammassinnittassasut, § 23 i, imm. 1 naapertorlugu niuerfimmut tunngatillugu aalajangigaaq tunngavigalugu.

Imm. 2. Pisussaaffik imm. 1-imi eqqaaneqaartutut ittoq atortussanngortinneqarsinnaavoq niuerfusunik misissuinerup ersersippagu neqerooruteqaartartoq unammillernerup amigarneranik pissuteqaartumik annerpaamik tigummisuusup akigititani piviusorsiunngitsumik qaffasissusillit atortiinnarsinnaagai, imaluunniit atuisartunut akornusiisumik akigititanik ”qerititsisimaguni”.

Imm. 3. Piumasaqaatinik aaqqissuussisarnerni imm. 1 naapertorlugu, neqerooruteqartartup pisussaaffeqartup aningaasaliissutai isiginiarneqassapput, naammaginatartumillu aningaasaliissutaanik erniortitsisoqarnissaa akuersarneqassalluni, aningaasaliinermi nalorninaatit ilaasut isiginiarlugit.

Imm. 4. Pisussaaffiliinermi imm. 1-imi eqqaaneqartutut ittuni qularnaarneqassaaq, aningaasartuutit matussusernissaannut isiginiagassat periaatsilluunniit akit aalajangersarnissaannut atorneqarsinnaasut naammassisaqarluarnissamik siunnerfeqassasut, aamma attanneqarsinnaasumik unammillertoqarnissaanik pilersitsissasut, atuisunullu amerlanerusunik iluaqutissarsitsissasut.

Imm. 5. Elektroniskiusumik attaveqaatigiissutit ataatsikkut aqqutitut kiffartuussinernut arlaqarnerusunut atorneqarpata, immikkoortukkaartumik isigalugit tamarmik ataasiakkaarlutik elektroniskiusumik attaveqaatigiissutitut aningaasartuutaasunik taakkualuunniit ilaannik matussusiisussatut, taava Atuisartoqarnermut Unammilleqatigiinnermullu Aqutsisoqarfiup nioqqutit internetimut appakaaffissaqartitsissutaasut akissaannik aalajangiisarnermi, arlariinnit atorneqaraangata aningaasartuutaasut naapertuuttumik agguarneqartarnissaat isumagisassavaa, atorneqarneranut attuumassuteqartuni, nioqqutitut internetimut appakaaffissaqartitsissutaasunik neqerooruteqartartut akornanni.

Imm. 6. Neqerooruteqartartoq annerpaamik tigummisuusoq pisussaaffiligaappat akinik nakkutilliinissamut, takuuk imm. 1, neqerooruteqartartoq tamatumunnga atatillugu pisussaaffilerneqarsinnaavoq aningaasartuutaasunik naatsorsuusiortarnermik atuinissaanik, akinik nakkutiginninnermut tapertatut. Tamatumungalugu atatillugu piumasaqaateqartoqarsinnaavoq neqerooruteqartartup aningaasartuutissanut naatsorsuusiortarneq atorneqartoq allaaserissagaa, tassanilu minnerpaatut aningaasartuutitut immikkoortut pingaarnerit arlariit aningaasartuutitut katersuiffiusut ersersinneqassasut, aamma aningaasartuutit agguarneqarneranni malittarisassat tunngaviusut, kikkunnit tamanit atorneqarsinnaalersillugit.

Imm. 7. Neqerooruteqartartoq annerpaamik tigummisuusoq neqerooruteqartartumut atasuunngitsumik pingajuusumik nakkutilliisitsissaaq aningaasartuutaasunut naatsorsuusiart imm. 6 naapertorlugu suliarineqarsimasut, pisussaaffiliussaasimasut naapertorlugit suliaasut, taakkualu naapertuunnerat pillugu oqaaseqaateqassalluni. Atuisartoqarnermut Unammilleqatigiinnermullu Aqutsisoqarfiup naapertuuttuuneritut uppersarsaatit ukiumoortumik tamanut takusassiarisassavaa.

Imm. 8. Atuisartoqarnermut Unammilleqatigiinnermullu Aqutsisoqarfiup niuerfimmi aalajangiinermi tak. § 23 i ersarinnerusunik maleruagassiussavaa akinik nakkutilliinermi aaqqissuussinerit periaaserineqartussat qanoq ittut atorneqassasut.

Aaqqissuussamik immikkoortitseqqanissamut pisussaaffik

§ 23 o. Aaqqissuussamik immikkoortitsinertut paasineqassaaq neqerooruteqartartoq annerpaamik tigummisuusoq nioqqutissiornermilu imaluunniit agguassisarfinni assigiinngitsut iluanni isumaginnittuusoq, niuerfiusumi nioqqutit internetimut appakaaffissaqartitsissutaasut tulluurtut amerlasuukkuutaarlugit tuniniarnerannut atatillugu ingerlatsivimmut arlaannaannulluunniit attuumassuteqanngitsumut isumagisassanngortissagaa.

Imm. 2. Atuisartoqarnermut Unammilleqatigiinnermullu Aqutsisoqarfik taamaallaat immikkut ittutugut neqerooruteqartartut annerpaamik tigumminnittuusunut suliat immikkoortisimaneqarnissaannik pisussaaffiliisinnaavoq, imaappat:

1) Atuisartoqarnermut Unammilleqatigiinnermullu Aqutsisoqarfiup nalilersuineranut atatillugu, takuuk § 23, g, paasippagu nioqqutit internetimut appakaaffissaqartitsissutaasut tulluurtut amerlasuukkuutaarlugit tuniniarnerannut atatillugu pingaaruteqartunik ataavartunillu unammilleqatigiinnermi ajornartorsiuteqartoq imaluunniit niuerfimmi ajutoortoqartoq, aamma

2) Atuisartoqarnermut Unammilleqatigiinnermullu Aqutsisoqarfiup nalilerpagu pisussaaffiit § 23 i, imm. 2, nr. 1-5 naapertorlugit tunniunneqarsimasut unammilleqatigiinnermik naammaginartumik pilersitsisimanngitsut.

Imm. 3. Ingerlatsinerit immikkoortisimaneqarnissaannut pisussaaffik makkuninnga imaqarsinnaavoq:

1) Immikkoortortoqarfinnik naleqquttunik ingerlatsivittut namminersortunngortillugit immikkoortitsineq.

2) Ingerlatsiviup ingerlataanik aamma nioqqutaanik imaluunniit kiffartuussinerinik ingerlatsivimmit tassannga isumagineqartussanik immikkoortitsineq.

3) Tigussaasumik sulisunik aamma pisortanik sulisut pisortallu sinneriniit immikkoortitsineq.

4) Ingerlatap iluani nakkutilliissutinik aaqqissuussanik pilersitsineq, ingerlatseqatigiiffiup immikkoortitsisumik ingerlatsinnginnissaanut anguniagaasunik isumaginnittussanik.

5) Aaqqissuussaanikkut iliuusissanik pilersitsineq, ingerlatsivimmi immikkoortitami sulisuusut pituttorsimannginnissaannik qularnaarisussamik, aaqqissuussaanerlu kajujuummissitsisusaaq tassunga tulluarsagaq.

6) Pisussaaffiit naammassineqarnissaannut qularnaarisussanik illup iluani atugassamik ilitersuusiorneq.

7) Ingerlatsinerit akimut ersittuunissaannik qularnaarisumik illup iluani atugassamik ilitersuusiorneq, minnerunngitsumik soqutiginnitsinut allanut atatillugu.

Nakkutilliineq il.il.

§ 23 p. Atuisartoqarnermut Unammilleqatigiinnermullu Aqutsisoqarfik nakkutilliisuvoq malittarisassat kapitalimi uani pineqartut eqqortinneqarnissaannut, aamma malittarisassat kapitali una naapertorlugu suliaasut eqqortinneqartarnissaannut.

Internetimut appakaaffissaqartitsinissamik noqqaassutit naleqquttut aamma peqatigiilluni ataatsimut atuisitsisinnaatitsineq

§ 23 q. Atuisartoqarnermut Unammilleqatigiinnermullu Aqutsisoqarfik aalajangiisnaavoq pisumi aalajangersimasumi naleqquttumik internetimut appakaaffissaqartitsinissamik imaluunniit peqatigiilluni ataatsimut atuisitsisinnaatitsinissamik imaluunniit atuuttup allanngortinnissaanut noqqaasoqarnersoq pillugu, § 23 a, imm. 2 imaluunniit § 23 i naapertorlugu.

Imm. 2. Qinnuteqaat attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartumit tunniunneqarsimassaaq, § 23 b, imm. 2-mi pineqartuni piumasaqarsinnaasumit imaluunniit ilaasumit.

Imm. 3. Atuisartoqarnermut Unammilleqatigiinnermullu Aqutsisoqarfiup imm. 1 tunngavigalugu aalajangiineri sapinngisamik sukkarnerpaamik pisassapput, sapinngisamillu kingusinnerpaamik qaammatit sisamat qaangiunneranni, attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartup suliassamik Atuisartoqarnermut Unammilleqatigiinnermullu Aqutsisoqarfimmut suliassanngortitsineraniit, imaluunniit suliap allatigut

akerleriissutaasunik suliaqartarnermut imm. 4 naapertorlugu suliassanngortinneqarneraniit.

Imm. 4. Atuisartoqarnermut Unammilleqatigiinnermullu Aqutsisoqarfik imm. 1 naapertorlugu aalajangiinissamut taarsiullugu aalajangersinnaavoq internetimut appakaaffissaqartitsinissamik aamma peqatigiilluni ataatsimut atuisitsisinnaatitsinissamik isumaqatigiissuteqarnissamut imaluunniit allannguinnissamut naleqquttumik noqqaassuteqarnerseq pillugit pisuni aalajangersimasuni suliat, allatigut akerleriissutaasut suliarineqartarnerinut malittarisassat naapertorlugit suliassanngortinneqassasoq, nalilerneqarpat akerleriissutaasup aaqqiissutissarsinissaanut tamanna naleqqunnerusoq. Naalakkersuisut akerleriissutaasut suliarineqartarneri pillugit ersarinnerisunik malittarisassiussapput.

Imm. 5. Suliami imm. 1-imi ilaasumi imm. 4-lu naapertorlugu akerleriissutaasut suliarineqartarnerannut malittarisassat naapertorlugit suliassanngortinneqarsimasumi attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut ilaat ataatsip peqataasup noqqaassutigippagu Atuisartoqarnermut Unammilleqatigiinnermullu Aqutsisoqarfiup imm. 1 naapertorlugu suliaq aalajangiiffigissavaa.

Aalajangiigallarnerit il.il.

§ 23 r. Atuisartoqarnermut Unammilleqatigiinnermullu Aqutsisoqarfik kapitali una imaluunniit malittarisassiat taanna naapertorlugu suliamik ingerlatsinermini paasissutissanik atortussanilluunniit piumasarisimasaminik tigusinngikkuni, takuuk § 30, taava paasissutissat pigineqartut tunngavigalugit aalajangiisinnaavoq.

Imm. 2. Atuisartoqarnermut Unammilleqatigiinnermullu Aqutsisoqarfik suliamik attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut akornanni internetimut appakaaffissaqartitsinissaq aamma peqatigiilluni ataatsimut atuisitsisinnaatitsinissaq pillugu ingerlatsinerminut atatillugu suliami akuusut susassaqtartut arlaanniit qinnuteqartoqarnera tunngavigalugu aalajangiiffigissinnaavaa:

- 1) internetimut appakaaffissaqartitsinissaq imaluunniit peqatigiilluni ataatsimut atuisitsisinnaatitsinissaq aallartinneqarallassasoq, ingerlanneqaannassasoq imaluunniit aallarteqqinneqassasoq, kiisalu
- 2) atugassarititaagallartussanik aamma akiusussanik aalajangiilluni.

Imm. 3. Atuisartoqarnermut Unammilleqatigiinnermullu Aqutsisoqarfiup imm. 2 naapertorlugu aalajangiigallarnek allanngortissinnaavaa.

Imm. 4. Inaarutaasumik isumaqatigiissutaasussamik isumaqatigiissuteqartoqarpat, aalajangiigallarnek atorunnaassaaq, isumaqatigiissutip atortuulerfaniit.

Imm. 5. Inaarutaasumik aalangiisoqarpat, akiusut imm. 2 aamma 3 naapertorlugit aalajangerneqarsimasut iluarsiivigineqassapput, taamaasilluni attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartut ima atugassaqtartinneqalissallutik inaarutaasumik aalajangiineq aalajangiigallarnerup atortuulerneraniit atortinneqalissalluni. Akiusunik kingumoortumik iluarsiiissuteqarnermi erniatigut annaasat annikinngitsut ilanngullugit isiginiarneqarsinnaapput.

Imm. 6. Attaveqatigiissutinik imaluunniit kiffartuussissutinik elektroniskiusunik ataqatigiissaakkanik kikkunnut tamanut neqerooruteqartartuq uppersaatissanik naammattunik saqqummiisimangippat, taamaattumillu aalajangiinerugallartumik aalajangiisoqartariaqarsimappat, takuuk imm. 2, imaluunniit pissutsit atuuttut tunngavigalugit aalajangiisoqarsimappat, takuuk, imm. 1, imm. 5 apeqqutaatinnagu

akiusunik kingumoortumik aaqqiissuteqartoqassaaq, kingumoortumik aaqqiissuteqarneq suliaqartuni pingajuusumut iluaqutissaappat.

Suliaqarfiit aalajangersimasut siunnerfigalugit unammilleqatigiinnermik aqutsinerup aningaasalersornera

§ 23 s. Suliaqarfiit aalajangersimasut siunnerfigalugit elektroniskiusunik attaveqaqatigiinnermut kiffartuussinernullu atatillugu unammilleqatigiinnermik aqutsinerup aningaasalersorneranut attaveqaqatigiinnermut attaviliisarnermut pisussaaffilernerqarsimasut tuniniaasartut, tak. § 23 j, allaffissornermut akiliummik akiliisassapput.

Imm. 2. Atuisartoqarnermut Unammilleqatigiinnermullu Aqutsisoqarfik akiliutip, tak. imm. 1, attaveqaatinik tuniniaasartut akornanni qanoq agguanneqarnissaa pillugu aalajangiisassaaq.

Imm. 3. Imm. 1 naapertorlugu akiliut Aningaasanut inatsimmi aalajangerneqartassaaq.

Kapitali 6

Tamanut ammatitsineq aamma allagaatinik takunnissinnaaneq

§ 24. Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat Inatsisartut inatsisaat manna malillugu sulianut atuutinngilaq, tassani ilaanatik § 4, imm. 2, § 7, imm. 6, § 8 imm. 2, oqaaseqatigiit aappaat, § 9, oqaaseqatigiit aappaat, § 10, imm. 1, § 11, imm. 6, § 12, imm. 3, oqaaseqatigiit aappaat aamma imm. 5, oqaaseqatigiit aappaat, § 15, imm. 4, § 17, imm. 3, § 26, imm. 3, aamma § 34, imm. 3 malillugit aalajangersakkanik aalajangersaanissaaq pillugu suliat. Taamaattoq pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni § 4, imm. 2, aamma § 6 atuutissapput. Paasissutissat Inatsisartut inatsisaat manna malillugu pissarsiarineqarsimasut ingerlatsivimmuut oqartussamut allamut tunniunneqarsimappata oqaaseqatigiit siulliit aamma oqaaseqatigiit aappaat aamma atuutissapput.

Imm. 2. Unammilleqatigiinnermut Ataatsimiititaliap oqaaseqaataa tunngavilersugaasoq aamma Naalakkersuisut § 2, imm. 4 malillugu akissuteqaataat, kiisalu Unammilleqatigiinnermut Ataatsimiititaliap Inatsisartut inatsisaat malillugu aalajangiineri tamanut ammasumik saqqummiunneqassapput. Aammattaaq aalajangiinerit Unammilleqatigiinnermut Ataatsimiititaliaq sinnerlugu Atuisartoqarnermut Unammilleqatigiinnermullu Aqutsisoqarfimmit aalajangiunneqartut, aalajangiineq Inatsisartut inatsisaata atornerarneranik paasinninnissamut pingaaruteqartutut imaluunniit allatigut tamanut ammasumik soqutiginaateqartutut nalilerneqarpat, tamanut ammasumik saqqummiunneqassapput. Suliani § 38 innersuussutigalugu akileeqqusissuteqarnermik pineqaatissiisoqartillugu imaluunniit aalajangiisoqartillugu, pineqaatissiineq, akileeqqusissuteqarnermik akuersineq imaluunniit taassuma naalisarnera tamanut ammasumik saqqummiunneqassaaq.

Imm. 3. Unammilleqatigiinnermut Ataatsimiititalia suliaqarnera aammalu nalinginnaasumik nassuiaasiai pillugit paasissutissat Unammilleqatigiinnermut Ataatsimiititaliap tamanut ammasumik saqqummiussinnaavai.

Imm. 4. Imm. 2 aamma 3 malillugit tamanut ammasumik saqqummiinnermi pissutsit teknikkimut tunngasut, ilanngullugit ilisimatusarneq, tunisassioriaatsit, tunisassiat kiisalu ingerlatsineri niuerneramilu isertuussassat, pillugit paasissutissat, inummut imaluunniit suliffeqarfimmut paasissutissanik peqarfiusumut aningaasaqarnikkut annertuumik pingaaruteqarsimappata, tamanut ammasumik

saqqummiunneqassanngillat. Aammattaaq suliffeqarfinni Aningaasaqarnermut nakkutilliisoqarfimmit nakkutigineqartuni sullitat ataasiakkaat pillugit paasissutissat tamanut ammasumik saqqummiunneqassanngillat.

Imm. 5. Unammilleqatigiinnermut Ataatsimiititaliamut paasissutissanik tunniussisussaq, ataatsimiititaliap siulitaasuanut piumasaqarsinnaavoq, paasissutissat imm. 4 naapertorlugu tunniuteqqusaanngitsut imaluunniit tamanut ammasumik pissarsiarineqarsinnaasussaanngitsut, aamma ataatsimiititaliami ilaasortanut tunniunneqassanngitsut. Siulittaasup inaarutaasumik aalajangissavaa paasissutissat qanoq annertutigisumik aammalu qanoq iluseqartumik tunniunneqartariaqaraluarnersut.

§ 25. Pisortat ingerlatsineranni suliassat suliarineqartarnerat pillugu Inatsisartut inatsisaat Inatsisartut inatsisaat manna malillugu suliani atuuppoq. Suliani pisortat ingerlatsineranni suliassat suliarineqartarnerat pillugu Inatsisartut inatsisaat malillugu suliami akuusumut tusarniaaffiusussaasuni, aalajangiinissamut missingiut tamaat suliamut akuusumut tusarniaassutigineqarnissaa pineqartunut ilaavoq. Oqaaseqaateqarnissamut piffissaliussaq minnerpaamik sapaatit akunnerinik 3-inik sivilissuseqassaaq, tamatumani suliaq Unammilleqatigiinnermut Ataatsimiititaliamut saqqummiunneqareersimanngippat.

Kapitali 7

Unammilleqatigiinnermut oqartussaasoq, aaqqissuussaaneq aamma piginnaatitaaffiit

§ 26. Unammilleqatigiinnermut Ataatsimiititaliap Inatsisartut inatsisaata matuma aammalu peqqussutit Inatsisartut inatsisaat manna malillugu aalajangersarneqartut malinneqarnissaa nakkutigissavaa. Unammilleqatigiinnermut Ataatsimiititaliap suliassaq nammineerluni suliniuteqarnermigut, nalunaarutiginnittoqarnerani imaluunniit naammagittaalliuutaasoq tunngavigalugu suliarisinnaavaa. Unammilleqatigiinnermut Ataatsimiititaliap aalajangissavaa suliami misissuinissamut imaluunniit aalajangiinissamut naammattumik pissutissaqarnersoq, ilanngullugu suliassamik suliarinninneq utaqqiisaasumik imaluunniit inaarutaasumik unitsinneqassanersooq. Taamatuttaaq suliffeqarfiit siusinnerusukkut § 29 malillugu neriorsuuteqareersimappata, Unammilleqatigiinnermut Ataatsimiititaliaq aalajangersinnaavoq suliassaq suliariniarnagu.

Imm. 2. Atuisartoqarnermut Unammilleqatigiinnermullu Aqutsisoqarfik Inatsisartut inatsisaat manna malillugu suliani Unammilleqatigiinnermut Ataatsimiititaliamut allattoqarfuvoq aammalu Unammilleqatigiinnermut Ataatsimiititaliaq sinnerlugu Inatsisartut inatsisaannik ulluinnarni allaffissornikkut aqutsineq isumagisaralugu. Atuisartoqarnermut Unammilleqatigiinnermullu Aqutsisoqarfik sulinermini Unammilleqatigiinnermut Ataatsimiititaliaq assigalugu arlaannaannulluunniit attuumassuteqanngitsumik atuuppoq.

Imm. 3. Unammilleqatigiinnermut Ataatsimiititaliap suleriaasissaa aammalu Unammilleqatigiinnermut Ataatsimiititaliap aamma Atuisartoqarnermut Unammilleqatigiinnermullu Aqutsisoqarfup sulinerannut maleruagassat erseqqinnerusut Unammilleqatigiinnermut Ataatsimiititaliamut ilaasortassanik inassuteqartarnermut toqqaasarnermullu, Unammilleqatigiinnermut Ataatsimiititaliap siulittaasuanit inassuteqaateqarnikkut piffissap atuuffissaasup naanissaa sioqqullugu ataatsimiititaliami ilaasortanik soraarsitsisarnermut maleruagassat kiisalu Unammilleqatigiinnermut Ataatsimiititaliami ilaasortat Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut

inatsisissaannut naapertuuttumik aningaasarsiaqartinneqarnissaat pillugu maleruagassat Naalakkersuisut aalajangersassavaat.

§ 27. Unammilleqatigiinnermut Ataatsimiititaliaq siulittaasoqarpoq arfinilinnillu ilaasortaqluni.

Imm. 2. Siulittaasoq ilaasortallu piffissamut ukiut sisamat tikillugit sivilissusilimmu Naalakkersuisunit toqqarneqassapput.

Imm. 3. Unammilleqatigiinnermut Ataatsimiititaliaq pisortani namminersortunilu inuussutissarsiornermi suliffeqarfinnut tamatigoortunik ilisimasaqassaaq, ilanngullugit inatsilerinnermut, aningaasaqarnermut, aningaasalersuisarnermut aamma atuisartoqarnermut tunngassuteqartut.

Imm. 4. Siulittaasoq aamma Unammilleqatigiinnermut Ataatsimiititaliami ilaasortat ikinnerpaamik pingasut inuussutissarsiornermi atuisartoqarnermilu soqutigisaqarnermut attuumassuteqassanngillat.

Imm. 5. Naalakkersuisut inuussutissarsiornermut kattuffiit ataatsimoortut inassuteqarnerat malillugu ilaasortaq ataaseq, atuisartoqarnermut kattuffinnit ataatsimoortunit inassuteqaat malillugu ilaasortaq ataaseq, aamma kommunit ataatsimoorlutik inassuteqarnerat malillugu pisortat inuussutissarsiornermik ingerlatsinerannik immikkut ilisimasaqartoq ilaasortaq ataaseq toqqartassavaat.

Imm. 6. Unammilleqatigiinnermut Ataatsimiititaliami ilaasortat inuttut suliatigullu piginnaasaqarnerat tunngavigalugu toqqarneqartassapput, aammalu sulinerminni arlaannaannulluunniit attuumassuteqanngitsumik atuutissallutik.

§ 28. Peqqusissuteqarnerit Unammilleqatigiinnermut Ataatsimiititaliap unammilleqatigiinnermi killilersuinerni ajoqutaasumik sunniutaasut unitsinneqarnissaat siunertarlugu § 6, imm. 4, oqaaseqatigiit siulliit, imaluunniit § 11, imm. 3, oqaaseqatigiit siulliit malillugit nalunaarutigisinnaasaat, ilaatigut tassaasinnaapput:

- 1) tamakkiisumik imaluunniit ilaannaasumik isumaqatigiissutit, akuersinerit, niuernermit tunngavissarititaasut atorunnaarsinneqarneri,
- 2) akiusut imaluunniit iluanaarutit allassimasut qaangerneqaqqusaanngitsut, imaluunniit akiusunik imaluunniit iluanaarutit naatsorsuinnermi naatsorsuinnermut maleruagassat aalajangersimasut atorneqassasut peqqusissuteqarneq,
- 3) suliffeqarfiit pineqartut ataaseq arlallilluunniit tunisinermut assingusumut suliffeqarfiup nalinginnaasumik atugassarititaatit atuuttut malillugit pisisartunut erseqqinnerusumik allassimasunut tunisisarnissamik pisussaaffeqartut. Taamaattoq suliffeqarfik tamatigut aningaasanngorlugit akiliisarnissaq imaluunniit toqqissisimanartumik qularnaveeqqusiisarnissaq piumasarisinnaavaa,
- 4) attaveqarnermi atortorissarutit, nioqqutissamik imaluunniit kiffartuussissummik neqerooruteqarsinnaanissamut pisariaqartunik atuisinnaatitsisoqassasq peqqusissuteqarneq, imaluunniit
- 5) peqatigiilluni niuernermit tunngavissarititaasut nalinginnaasut Atuisartoqarnermut Unammilleqatigiinnermullu Aqutsisoqarfinnut nalunaarutigisarnissaannik pisussaaffeqartut.

Imm. 2. Imm. 1, nr. 5 malillugu peqqusissuteqarneq, piffissamit aalajangiinerup inaarutaasumit pinneranit ukiuni marlunni atuuppoq.

§ 29. Neriorsuutit suliffeqarfinnit tunniunneqartut aammalu Unammilleqatigiinnermut Ataatsimiititaliap § 6, imm. 1-imut, imaluunniit § 11, imm. 1-imut tunngatillugu nalorninarloqartitsinerinik

naammassinnittut, ataatsimiititaliamit suliffeqarfinnit saneqqunneqarsinnaanngitsinneqarsinnaapput. Neriorsuut piffissamut killiligaasinnaavoq.

Imm. 2. Neriorsuutip saneqqunneqarsinnaanngitsinneqareernerani, takuuk imm. 1, Unammilleqatigiinnermut Ataatsimiititaliaq neriorsuutip tunniunneqartup piffissaq eqqorlugu aammalu eqqortumik naammassineqarnissaata qulakkeerneqarnissaanut pisariaqartumik peqqusissuteqarsinnaavoq.

Imm. 3. Unammilleqatigiinnermut Ataatsimiititaliap imm. 1 malillugu aalajangiineq utertissinnaavaa, imaattoqarpat:

- 1) pissusiviusut aalajangiinnermut immikkoortumi pingaaruteqartumi allannguuteqarsimappata,
- 2) isumaqatigiisummi, akuersinnermi imaluunniit suleriaatsimi ataqatigiissinneqartumi peqataasut, neriorsuummut tunniunneqartumut akerliusumik iliuuseqarpata, imaluunniit
- 3) aalajangiineq isumaqatigiisummi, akuersinnermi imaluunniit suleriaatsimi ataqatigiissitami peqataasunit paasissutissat eqqunngitsut imaluunniit uukapaatitsisut tunngavigalugit pisimappat.

§ 30. Unammilleqatigiinnermut Ataatsimiititaliap paasissutissat pissutsit Inatsisartut inatsisaanni aalajangersakkani pineqartunut ilaanersut naliliinissamut pisariaqartut tamaasa piumasarisinnaavai.

Imm. 2. Unammilleqatigiinnermut Ataatsimiititaliap ilanngullugu naatsorsuutit, naatsorsuutitut najoqqutassat, atuakkanit pappialanngortitat, niuernermi pappiaqqat allat aamma nalunaarsuutit elektroniskimik toqqortarineqartut saqqummiunneqarnissaat piumasarisinnaavaa.

Imm. 3. Imm. 1-imi paasissutissat taaneqartut Atuisartoqarnermut Unammilleqatigiinnermullu Aqutsisoqarfiup Sverigemi, Norgemi, Islandimi, Finlandimi, Savalimmiuni Danmarkimilu unammilleqatigiinnermik oqartussanut ikiuinnermini atornissai aamma piumasarineqarsinnaapput, oqartussat taakku namminneq nunaminni unammilleqatigiinneq pillugu malittarisassanik atuinissaat siunertaralugu.

§ 31. Atuisartoqarnermut Unammilleqatigiinnermullu Aqutsisoqarfik Unammilleqatigiinnermut Ataatsimiititaliap suliaqarneranut atugassanik nakkutiginnilluni misissuisinnaavoq, Atuisartoqarnermut Unammilleqatigiinnermullu Aqutsisoqarfiup suliffeqarfiup imaluunniit kattuffiup inaataannut aamma assartuussissutaanut paasissutissanik sunilluunniit ilisimannilernissaq imaluunniit assilinerinik tigusinissaq siunertaralugu isersinnaalernissamik kinguneqartumik, ilanngullugit naatsorsuutit, naatsorsuutitut najoqqutassat, atuakkat allallu niuernermi pappiaqqat, paasissutissanut saqqummersitsiviusup ilusaa apeqqutaatinagu. Nakkutiginnilluni misissuinnermut atatillugu Atuisartoqarnermut Unammilleqatigiinnermullu Aqutsisoqarfiup ilisimannilernissaa aammalu pisariaqarpat taakkua assilinerinik tiguisinnaanissaa siunertaralugu, Atuisartoqarnermut Unammilleqatigiinnermullu Aqutsisoqarfiup oqaasiinnartigut nassuiaanissaq piumasarisinnaavaa, kiisalu inuit nakkutiginnilluni misissuinnermi pineqartunut ilaasut kaasarfimmik, taskimik ilaalu ilanngullugit imaani takutitsinissai piumasarisinnaallugu.

Imm. 2. Suliffeqarfiup imaluunniit kattuffiup paasissutissaatai avataani qarasaasiamik suliaqartartumi paarineqarpata imaluunniit suliarineqarlutik, Atuisartoqarnermut Unammilleqatigiinnermullu Aqutsisoqarfik paasissutissanik ilisimannilernissaq aammalu assilinerinik tigusinissaq siunertaralugu avataaneersumut qarasaasiamik suliaqartartumut isersinnaalersinnaavoq. Isersinnaalernissamut tunngaviussaaq Atuisartoqarnermut Unammilleqatigiinnermullu Aqutsisoqarfik paasissutissanik

pineqartunit toqqaannartumik suliffeqarfimmit imaluunniit kattuffimmit nakkutiginnilluni misissuiffigineqartunit pissarsisinnaanera ajornartoq.

Imm. 3. Imm. 1 malillugu misissuinermit atatillugu paasissutissanik sunilluunniit ilisimannilernissaq aammalu assilinerinik tigusinissaq siunertarlugu Atuisartoqarnermut Unammilleqatigiinnermullu Aqutsisoqarfik sulisut namminneerlutik angerlarsimaffini misissuiniarluni isersinnaalersinnaavoq, ilanngullugit naatsorsuutit, naatsorsuutitut najoqqutassat, atuakkat allallu niuernermit pappiaqqat, paasissutissanut saqqummersitsiviusup ilusaa apeqqutaatinnagu.

Imm. 4. Atuisartoqarnermut Unammilleqatigiinnermullu Aqutsisoqarfik Sverigemi, Norgemi, Islandimi, Finlandimi, Savalimmiuni Danmarkimilu unammilleqatigiinnermik oqartussanut ikiuiniarluni nakkutilliilluni misissuisinnaavoq, oqartussat taakku namminneq nunaminni unammilleqatigiinneq pillugu malittarisassanik atuinissaannut tunngatillugu. Taamatuttaaq § 32-imi malittarisassat atortinneqassapput.

Imm. 5. Atuisartoqarnermut Unammilleqatigiinnermullu Aqutsisoqarfiup imm. 1-3 malillugit nakkutilliilluni misissuineri taamaallaat Kalaallit Nunaanni Eqqartuussivinnit eqqartuussinermit aalajangiinnermik piniareernerup kingorna aammalu peqqissaartumik kinaassutsimut uppersaammik takutitsilluni pisinnaavoq.

§ 32. § 31 malillugu nakkutilliilluni misissuinermit atatillugu Atuisartoqarnermut Unammilleqatigiinnermullu Aqutsisoqarfik elektroniskimik paasissutissaasivinni paasissutissat imarisaannik nakkutilliilluni misissuinermit pineqartunit ilaasunik tarrarsuisinnaavoq, aammalu najoqqutassat tarrarsukkat tamatuma kingorna misissornissaat siunertarlugu nassarsinnaallugit. Atuisartoqarnermut Unammilleqatigiinnermullu Aqutsisoqarfiup suliffeqarfiup imaluunniit avataani qarasaasiamik suliaqartartup inaatai imaluunniit sulisut angerlarsimaffia qimappagit, najoqqutassat tarrarsukkat ammarnaveerlugit matuneqassapput. Suliffeqarfik imaluunniit tassanngaaniit aallartitaasoq, najoqqutassat ammarnaveerlugit matusimasut ammarneqalerpata aammalu Atuisartoqarnermut Unammilleqatigiinnermullu Aqutsisoqarfiup najoqqutassat tarrarsukkat misissulerpagit najuussinnaatitaavoq, sulisut angerlarsimaffimmini misissuiffigitittut taamatut aamma pisinnaatitaaffeqarput. Atuisartoqarnermut Unammilleqatigiinnermullu Aqutsisoqarfiup nakkutilliilluni misissuinerup kingorna kingusinnerpaamik ulluinaat 40-it qaangiunneranni, paasissutissanit assilillugit tigusat, Atuisartoqarnermut Unammilleqatigiinnermullu Aqutsisoqarfiup najoqqutassanik tarrarsukkanik tigusimasinnaasai ataatsimoortut, nakkutilliilluni misissuiffigineqartumut tunniutissavai. Najoqqutassat tarrarsukkat misissorneqarnerat naammassippat, najoqqutassat tarrarsukkat ammarnaveerlugit matusimatillugit uninngasuutigineqassapput. Atuisartoqarnermut Unammilleqatigiinnermullu Aqutsisoqarfik naliliippat suliaq unammilleqatigiinnermut maleruagassanik unioqqutitsinermit uppersaataatitaqanngitsaq, najoqqutassat tarrarsukkat nunguterlugit piiarneqassapput. Atuisartoqarnermut Unammilleqatigiinnermullu Aqutsisoqarfiup suliamik ingerlatitseqqinnissaq aalajangiuppagu, suliaq inaarutaasumik aalajangiiffigineqareerpat najoqqutassat tarrarsukkat nunguterlugit piiarneqassapput.

Imm. 2. Suliffeqarfimmi imaluunniit kattuffimmi pissutsit pissutaallutik, ulloq taanna nakkutilliilluni misissuinermit ingerlatsiviusaq, paasissutissanik pissarsinissaq imaluunniit assilillugit tigusinissaq Atuisartoqarnermut Unammilleqatigiinnermullu Aqutsisoqarfimmut ajornarsimappat, Atuisartoqarnermut Unammilleqatigiinnermullu Aqutsisoqarfiup niuerfimmi init paasissutissallu attuumassuteqartut tamatuma kingorna ulluinaat pingasut tikillugit ammarnaveerlugit matusinnaavai.

Imm. 3. Imm. 2-imituulli piumasaqaatitaqartumik Atuisartoqarnermut Unammilleqatigiinnermullu Aqutsisoqarfiup uppersaalluni atsiornertalimmik, paasissutissat imaluunniit paasissutissaasivik paasissutissat inissisimaffigisaat, assilillugit tigusinissaq siunertaralugu nassarsinnaavaa. Najoqqutassat Atuisartoqarnermut Unammilleqatigiinnermullu Aqutsisoqarfimmit nassarneqartut assilillugit tiguneqartunut allattuiffik ilanngullugu, aammalu paasissutissat assilineri ataatsimoortut Atuisartoqarnermut Unammilleqatigiinnermullu Aqutsisoqarfiup erseqqinnerusumik misissuinissamut atugassatut tigusimasai, suliffeqarfimmut imaluunniit kattuffimmut nakkutilliilluni misissuereernerup kingorna kingusinnerpaamik ulluinnaat pingasut qaangiunneranni utertillugit tunniunneqassapput.

Imm. 4. Atuisartoqarnermut Unammilleqatigiinnermullu Aqutsisoqarfiup immikkut pisoqartillugu imm. 1-3-imi piffissaliussat sivitsorsinnaavai.

§ 32 a. Atuisartoqarnermut Unammilleqatigiinnermullu Aqutsisoqarfik quppersakkamik pilersitsinnaavoq, kinaassutsiminnik isertuussillutik Inatsisartut inatsisaanni unioqqutitsinerit pillugit saaffiginiffusartussamik.

Imm. 2. Atuisartoqarnermut Unammilleqatigiinnermullu Aqutsisoqarfik suliffeqarfimmut naammagittaalliutigineqartumut allamulluunniit ilisimatitsisinaanngilaq imm. 1 naapertorlugu saaffiginissummik tigusaqarsimanini pillugu.

Imm. 3. Kinaassutsiminik isertuussilluni Atuisartoqarnermut Unammilleqatigiinnermullu Aqutsisoqarfimmut saaffiginissimasoq aqutsisoqarfimmut akuersissuteqarsinnaavoq aqutsisoqarfiup suliffeqarfik naammagittaalliutigineqartumut imaluunniit allanut ilisimatitsissutigisinnaagaa, aqutsisoqarfik saaffiginissummik tigusaqarsimasoq. Pineqartoq akuersisinnaavoq Aqutsisoqarfik suliffeqarfimmut naammagittaalliutigineqartumut imaluunniit allanut saaffiginissuteqarsimasup atianik ilisimatitsissutigineqarsinnaalluni. Pineqartoq tamakkiisumik imaluunniit ilaannakuusumik akuersisinnaavoq aqutsisoqarfik suliffeqarfimmut imaluunniit allanut saaffiginissutaasup imaa pillugu ingerlatitseqqissinnaasoq.

§ 33. Politiit Atuisartoqarnermut Unammilleqatigiinnermullu Aqutsisoqarfik § 31, imm. 1-3 aamma § 32, imm. 1-4-mi pisinnaatitsissutit naapertorlugit suliaqarnerani ikiortassavaat.

§ 34. Atuisartoqarnermut Unammilleqatigiinnermullu Aqutsisoqarfiup nunani allani unammilleqatigiinnermut oqartussaasunut, suleqatigiinneq apeqqutaatillugu, paasissutissat Atuisartoqarnermut Unammilleqatigiinnermullu Aqutsisoqarfiup nipangiussisimasussaataitanerani pineqartunut ilaasut, aammalu nunat taakkua unammilleqatigiinnermut inatsisaannik atuutsitsinissamik siuarsaanissamut pisariaqartut ingerlateqqissinnaavai, ilanngullugit Kalaallit Nunaata Naalagaaffeqatigiinnerup iluani suleqatigiit marluk akornanni imaluunniit suleqatigiit arlallit akornanni pisussaaffinik naammassinninnissaq siunertaralugu.

Imm. 2. Nunani allani unammilleqatigiinnermut oqartussaasunut paasissutissanik ingerlatitseqqilluni tunniussinissamut Atuisartoqarnermut Unammilleqatigiinnermullu Aqutsisoqarfiup ingerlatitseqqilluni tunniussinissamut piumasaqaatitarsinnaavaa, paasissutissat:

- 1) tiguisumi taamatuttaaq nipangiussisimasussaataitaneq atuutissasoq,
- 2) suleqatigiit marluk imaluunniit suleqatigiit arlallit isumaqatigiissutaanni atuuttumi siunertamut aalajangersarneqartumut, paarlaasseqatigiinneq taanna malillugu pisimappat, taamaallaat atorneqassasut,

aamma

3) taamaallaat Atuisartoqarnermut Unammilleqatigiinnermullu Aqutsisoqarfiup erseqqissumik akuersissutitaqartumik ingerlateqqinneqarsinnaasut aammalu taamaallaat siunertamut akuersinermi pineqartunut ilaasumi.

Imm. 3. Atuisartoqarnermut Unammilleqatigiinnermullu Aqutsisoqarfiup paasissutissanik Inatsisartut inatsisaanni nipangiussisimasussaataitaanermi pineqartunut ilaasunik nunanit allamiunut oqartussanut ingerlatitseqqilluni tunniussisarneq pillugu maleruagassanik erseqqinnerusunik Naalakkersuisut aalajangersaasinnaapput.

Kapitali 8

Naammagittaalliuteqartarneq

§ 35. Unammilleqatigiinnermut Aalajangiisartut aamma Atuisartoqarnermut Unammilleqatigiinnermullu Aqutsisoqarfiup Inatsisartut inatsisaat naapertorlugu aalajangigaat allaffissornikkut oqartussanut allanut ingerlateqqinneqarsinnaanngillat.

Imm. 2. Unammilleqatigiinnermut Ataatsimiititaliap Inatsisartut inatsisaat malillugu aalajangiineri Kalaallit Nunaata Eqqartuussivianut siullertut oqartussaasumut suliaakkiissutigineqarsinnaapput.

Imm. 3. § 24, imm. 4 malillugu aalajangiinerit suliaakkiissutigineqarneri, kinguartitsinermik sunniuteqassapput. Aalajangiinernik allanik suliaakkiissuteqarnerit Unammilleqatigiinnermut Ataatsimiititaliamit imaluunniit Kalaallit Nunaata Eqqartuussivianit kinguartitsinermik sunniuteqartinneqarsinnaapput.

§ 36. Aalajangiinerit Kalaallit Nunaata Eqqartuussivianut suliaakkiissutigineqarnerat, pineqartumut aalajangiinerup nalunaarutigineqareernerata kingorna, kingusinnerpaamik sapaatit akunneri 4 qaangiutsinnagit pissaaq. Tunngaviusut immikkut ittut tunngavissaqartippassuk, Kalaallit Nunaata Eqqartuussiviata suliaakkiissuteqarnissamut piffissaliussap qaangertinneqarnera akuerisinnaavaa.

Kapitali 9

Pineqaatissiisarnermut aalajangersakkat il.il.

§ 37. Naalakkersuisut imaluunniit Naalakkersuisunit tamatumunnga piginnaatitaasoq, ullut tamaasa imaluunniit sapaatit akunneri tamaasa pinngitsaaliissumik akileeqqussisummik pisussaaffiliisinnaapput:

- 1) paasissutissanik Unammilleqatigiinnermut Ataatsimiititaliap Inatsisartut inatsisaat manna malillugu piumasaqaatigisinnaasaannik tunniussinngitsunut,
- 2) atugassarititaasumik imaluunniit peqqusissutaasumik Inatsisartut inatsisaat manna malillugu nalunaarutigineqartumik malinninngitsunut, imaluunniit
- 3) neriorsuummik saneqqunneqarsinnaanngitsinneqartumik malinninngitsunut, takuuk § 29.

§ 38. Piaarinaatsoorluni imaluunniit mianersuaalliorujussuarluni ukuninnga unioqqutitsisoq akiliisitaasinneqarsinnaavoq:

- 1) § 6, imm. 1-imik unioqqutitsisoq,
- 2) piumasamik § 8, imm. 3, imm. 3-at naapertorlugu nalunaarutigineqartumik unioqqutitsisoq imaluunniit

naalanngitsoq,

3) § 11, im. 1-imik unioqqutitsisoq,

4) § 12, imm. 1 naapertorlugu peqqussummik unioqqutitsisoq imaluunniit naalanngitsoq,

5) § 13, imm. 1 naapertorlugu inerteqqummik eqqortitsinngitsoq,

6) § 17, imm. 1 naapertorlugu kattunermik nalunaarutiginninngitsoq,

7) § 19, imm. 2 naapertorlugu kattunnissamut inerteqqusineq eqqortinnagu kattunermik piviusunngortitsisoq, § 19, imm. 5, imm. 1-at naapertorlugu kattunnissap akuerineqannginnerani piviusunngortinnissaanut inerteqqummik unioqqutitsisoq, § 19, imm. 6, imaluunniit § 21, imm. 1 imaluunniit imm. 3 naapertorlugu piumasamik imaluunniit peqqussummik naalanngitsoq, imaluunniit § 23 naapertorlugu peqqussummik naalanngitsoq,

8) § 23 c-mik unioqqutitsisoq,

9) § 23 i, imm. 2, nr. 2 aamma 3-mi allassimasutut pisussaaffimmik § 23 i, imm. 1 naapertorlugu aalajangerneqarsimasoq naapertorlugu neqerooruteqartartumut pisussaaffiliunneqarsimasumik malinninngitsoq,

10) § 28 naapertorlugu peqqussummik unioqqutitsisoq imaluunniit naalanngitsoq,

11) neriorsuummik § 29, imm. 1 naapertorlugu unioqqutinneqassanngitsumik unioqqutitsisoq imaluunniit naalanngitsoq,

12) § 29, imm. 2 naapertorlugu peqqussummik unioqqutitsisoq imaluunniit naalanngitsoq,

13) § 30 naapertorlugu piumasaqaammik naalanngitsoq, imaluunniit

14) Unammilleqatigiinnermut ataatsimiititaliamut imaluunniit Atuisartoqarnermut Unammilleqatigiinnermullu Aqutsisoqarfimmu paasissutissanik eqqunngitsunik imaluunniit tammartitsisunik tunniussaartoq imaluunniit suliamut paasissutissarsiorfigisamut paasissutissat pingaartut nipangiunneqarpata.

Imm. 2. Imm. 1, nr. 1, isumaqatigiissuteqarnermiit, suliffeqarfiit kattunnerisa imaluunniit sulisaatsit ataatsimut aaqqissuunnerisa akuerineqarneranniit § 8, imm. 1, imaluunniit imm. 4 naapertorlugu Unammilleqatigiinnermut ataatsimiititaliamut nalunaarutigineqarneranniit Unammilleqatigiinnermullu ataatsimiititaliap § 8, imm. 1, imaluunniit imm. 4 naapertorlugu aalajangiinissaata tungaanut atortinneqassanngilaq.

Imm. 3. Inatsisartut inatsisaat manna naapertorlugu najoqqutassiani Kalaallit Nunaanni pinerluttulerinnermut inatsit naapertorlugu akiliisitsisoqarsinnaavoq.

Imm. 4. Inatsisartut inatsisaat imaluunniit Inatsisartut inatsisaat naapertorlugu najoqqutassiani akiliisitsinissamik tunngavissaqartitsippat akiliisitsineq Kalaallit Nunaanni pinerluttulerinnermut inatsimmi malittarisassat naapertorlugit inatsisitigut inuttut naatsorsuussamut akiligassanngortinneqarsinnaavoq.

Imm. 5. Imm. 1 aamma imm. 3-4 naapertorlugit akiliisitsinerit Landskarsimut nakkartinneqassapput.

Imm. 6. Kalaallit Nunaanni pinerluttulerinnermut inatsit naapertorlugu pineqaatissiisoqarsinnaavoq § 6, imm. 1-imut akerliusumik unammilleqatigiinneq millisillugu niuernikkut isumaqatigiissuteqartoqarpata, unioqqutitsineq siunertaqartumik pisimappat ingasallunilu, ingammik unioqqutitsinerup annertussusia imaluunniit ajoqusiinerit kingunerisinnaasai peqqutigalugit. Imm. 1 naapertorlugu unammilleqatigiinneq millisillugu niuernikkut isumaqatigiissuteqarneq paasineqassaaq isumaqatigiissut, sulisaatsit ataatsimut aaqqissuunneri imaluunniit suliffeqarfiit akornanni kaaviiartaqarfimmi assigiinni makku pillugit akuersineq:

1) akit, iluanaarutit assigisaalluunniit nioqqutit kiffartuussissutilluunniit tunineqarnerannit imaluunniit

tuneqqinneqarnerannit pisut,

- 2) nioqqutissiornerup tunisaqarnerulluunniit killilersorneri,
- 3) niuerfinnik atusunilluunniit immikkoortiterineq, imaluunniit
- 4) neqeroorutiniq ataqatigiissaarineq.

Imm. 7. § 6, imm. 1-imut akерliusumik pissutsit immikkut sakkortunerusut atorlugit unammilleqatigiinneq millisillugu niuernikkut immikkut ingasaassaamik isumaqatigiissuteqartoq Kalaallit Nunaanni pinerluttulerinermut inatsit naapertorlugu pineqaatissinneqarsinnaavoq. Pissutsinut immikkut sakkortunerusunut ingammik ilaatinneqarpoq unioqqutitsineq annertoq imaluunniit annertuumik ajoqusiinermik kinguneqartitsisinnaasoq.

Imm. 8. Suliffeqarfinnut pineqaatissiissutitut akiliisitsissutit annertussusilernerini uku aallaavigineqassapput:

- 1) aningaasaqarnikkut iluanaarutit anguneqarsimasut imaluunniit anguniarneqartut, taakku naatsorsorneqarsinnaappata,
- 2) unioqqutitsinerup annertussusaa,
- 3) unioqqutitsinerup sivirususaa aamma
- 4) suliffeqarfup kaaviiartitai.

§ 38 a. Unammilleqatigiinnermut ataatsimiititaliaq Inatsisartut Inatsisaannik matuminnga unioqqutitsinerup imaluunniit malittarisassanik inatsimmik matuminnga unngavilinnik unioqqutitsinerup nalilerneqartunut akiliisitsinerup annertunerusumik pineqaatissiissutaasussaangitsutut atatillugu nalunaarutigisinnaavaa suliaq eqqartuussissusilersuussinertaqanngitsumik aalajangiiffigineqarsinnaasoq, unioqqutitsimasoq unioqqutitsisimanermut pisuulluni nassuerpat, nalunaarlunilu piffissap nalunaarneqartup iluani akiliisitsissutissatut nalunaarutigineqartoq naapertorlugu akiliisinnaalluni.

Imm. 2. Kalaallit Nunaanni eqqartuussisarnermi inatsimmi malittarisassat unnerluussissuteqarnermi allakkiap qanoq imaqaarnissaa pillugu piumasaqaataasut, aamma unnerluutigineqartoq oqaaseqarnissamut pisussaaffeqanngitsut pillugu aamma assigisaanik atortinneqassapput akiliisussanngortitsinerup.

Imm. 3. Akiliisitsissutissaq akuersissutigineqarpat, ingerlaqqittumik malersueqqinnissaq atorunnaassaaq

§ 39. Niuernikkut unammilleqatigiinnermik annikillitsisumik isumaqatigiissuteqarluni § 6-imut akерliusumik iliuuseqartoq, akileeqqusissummut imaluunniit paarnaarusaanissamut unammilleqatigiinnermik annikillitsinerup peqataanerminut pineqartup pisussaaffigisussaagaluagaanut eqqartuunneqannginnissamik angusaqarsinnaavoq, qinnuteqartoq siulliulluni oqartussaasunut saaffiginnikkuni, aammalu unammilleqatigiinnermik annikillitsisineq pillugu paasissutissanik oqartussaasut qinnuteqarnerup nalaani pigisarinngisaannik saqqummiussilluni. Paasissutissat makkua pineqartuussapput:

- 1) pissutsit pineqartut pillugit oqartussaasut nammineerlutik nakkutiginninnermi misissuinnginnerminni imaluunniit ornigullutik misissuinnginnerminni, oqartussaasut pissutsit pineqartut pillugit nakkutiginninnermi misissuinnermik, ornigullutik misissuinnermik imaluunniit politiinut nalunaarutiginninnermik aallartitsinissamut pissutaasoq aalajangersimasoq oqaatigissavaat, imaluunniit
- 2) pissutsit pineqartut pillugit oqartussaasut nakkutiginninnermi misissuereerneranni imaluunniit ornigullutik misissuereerneranni, oqartussaasut niuernermi unammilleqatigiinnermik annikillitsisumik

suliaqarnertut iluseqartumik unioqqutitsinermik paasisaqarsinnaalersimassasut.

Imm. 2. Unnerluutiginninninnissaq aatsaat anguneqarsinnaavoq, qinnuteqartoq:

- 1) suliap suliarineqarnera tamaat oqartussasunut suleqataappat,
- 2) kingusinnerpaamik qinnuteqaatip tunniunneqarnerani niuernermi unammilleqatigiinnermik annikillisitsisumik peqataanerminik unitsitsippat, aamma
- 3) allanik niuernermi unammilleqatigiinnermik annikillisitsisumik peqataanissamut pinngitsaaliisimangippat.

Imm. 3. Qinnuteqartup unnerluutiginninninnissamut tunngavissarititaasut imm. 1, nr. 1-imi imaluunniit 2-imi taaneqartut qinnuteqartup naammassisimangippagit, qinnuteqaat akileeqqusisummik annikillisitsinissamik qinnuteqaatitut isigineqassaaq, takuuk § 40, imm. 1.

§ 40. Niuernermi unammilleqatigiinnermik annikillisitsisumik isumaqatigiissuteqarluni § 6-imut akerliusumik iliuuseqartoq, akileeqqusissutip pineqartup niuernermi unammilleqatigiinnermik annikillisitsisumik isumaqatigiissuteqarnermi peqataanermini pisussaaffigiligassaraluata annikillineqarnissaanik angusaqarsinnaavoq:

- 1) qinnuteqartoq niuernermi unammilleqatigiinnermik annikillisitsisumik isumaqatigiissummut tunngatillugu paasissutissanut oqartussaasut pigeriigaannut naleqqiullugu annertuumik naleqarnerulersitsisunik paasissutissanik saqqummiiguni, aamma
- 2) qinnuteqartup § 39, imm. 2-imi tunngavissarititaasut allassimasut naammassisimagunigit.

Imm. 2. Qinnuteqartumut siullermut imm. 1-imi tunngavissarititaasunik naammassinnittumut akileeqqusisummik annikillisitsineq, akileeqqusissutip pineqartup niuernermi unammilleqatigiinnermik annikillisitsisumik isumaqatigiissuteqarnermi peqataanermini pisussaaffigiligassaraluata 50 procentiatut annertussuseqarpoq. Qinnuteqartup aappaanut imm. 1-imi tunngavissarititaasunik naammassinnittumut akileeqqusisummik annikillisitsineq 30 procentiuvoq. Qinnuteqartunut taakkua kinguliiniittunut imm. 1-imi tunngavissarititaasunik naammassinnittunut, akileeqqusisummik annikillisitsineq 20 procentit tikillugit annertussuseqarpoq.

§ 41. Unnerluutigineqannginnissamik imaluunniit akileeqqusisummik annikillisitsinissamik qinnuteqaat Atuisartoqarnermut Unammilleqatigiinnermullu Aqutsisoqarfimmut tunniunneqassaaq. Suliani inuit imaluunniit suliffeqarfiit unnerluutigisaappata, imaluunniit Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisoq niuernermi unammilleqatigiinnermik annikillisitsisumik isumaqatigiissuteqarluni unioqqutitsinermik pasitsaanneqartumik misissuineramik aallartitsisimappat, pineqaatissiissutinik qasukkartitsinissamut qinnuteqaat aamma Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisumut tunniunneqarsinnaavoq.

Imm. 2. Imm. 1 malillugu qinnuteqaat, suleriaaseq manna malillugu suliarineqassaaq:

- 1) Oqartussaasoq qinnuteqaammik tigusaqartoq, takuuk imm. 1, taassuma tiguismaneranut uppernarsaassaaq.
- 2) Oqartussaasoq aalajangiisussaasoq, takuuk § 42, imm. 1, neriorsuutaagallartumik tunisissaaq, § 39, imm. 1-imi imaluunniit § 40, imm. 1-imi tunngavissarititaasut naammassineqarsimanersut, aammalu piffissami tassani qinnuteqaatip itigartinneqarnissaanut tunngavissaqarsimanersooq, pissutigalugu § 39, imm. 2-imi tunngavissarititaasut naammassineqarsimanngitsut naliliisoqarmat, paasissutissanik imaqartumik.

3) Suliami paasissutissat nalilersuinerlu inaarutaasumik naammassereerpata, oqartussaasoq aalajangiisussaq, takuuk § 42, imm. 2, qinnuteqartup § 39, imm. 2-imi tunngavissarititaasut naammassisimanerai nalunaaruteqassaaq, aammalu taamaattoqarsimappat neriorsuutaagallartumut nr. 2 malillugu qinnuteqartup pissarsiarisimasaanut naapertuuttumik unnerluussinnginnissaq imaluunniit akileeqqusissummik annikillisisineq nalunaarutigissallugu.

§ 42. Neriorsuutaagallartoq oqartussaasumit § 41, imm. 1-imut naapertuuttumik qinnuteqaammik tigusisimasumit tunniunneqassaaq. Oqartussaasup § 41, imm. 2, nr. 2 malillugu neriorsuutaagallartumik tunniussinissaa sioqqullugu, neriorsuut Atuisartoqarnermut Unammilleqatigiinnermullu Aqutsisoqarfiup aamma Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisup akornanni oqaluuserineqarsimassaaq. Akileeqqusissutip atorunnaarsinnissaanut neriorsuutaagallartoq taamaallaat tunniunneqarsinnaavoq, oqartussaasut taakkua tamanna isumaqatigiissutigippassuk.

Imm. 2. § 41, imm. 2, nr. 3 malillugu unnerluutiginninnginnissamik nalunaaruteqarneq, Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisumit Atuisartoqarnermut Unammilleqatigiinnermullu Aqutsisoqarfimmut tusarniaareernerup kingorna unnerluutiginninnginnissatut iluseqartumik nalunaarutigineqassaaq. § 41, imm. 2, nr. 3 malillugu akileeqqusissummik annikillisisinissaq pillugu nalunaaruteqarneq, Atuisartoqarnermut Unammilleqatigiinnermullu Aqutsisoqarfimmut tusarniaareernerup kingorna Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisumit, suliami aalajangersimasumi tassani akileeqqusissuteqarsimasumit imaluunniit suliamik eqqartuussivinnut tunniussisimasumit, nalunaarutigineqassaaq.

§ 43. Suliffeqarfinit assigiinngitsunit qinnuteqaatit, qinnuteqartut suliffissuarmi ataatsimoorlutik atasimanngikkunik aammalu qinnuteqaammi immikkut allassimappat ingerlatseqatigiiffiit sorliit qinnuteqaammi pineqartunut ilaanersut, pineqaatissiinerit qasukkartinnissaat pillugu ataatsimoortumik qinnuteqaatitut tunniunneqarsinnaanngillat, aammalu qinnuteqaat.

Imm. 2. Suliffeqarfimmit imaluunniit kattuffimmit qinnuteqaammi ingerlaannartumik maannakkut siusinnerusukkullu siulersuisuni ilaasortat, sulisut aqutsisuneersut imaluunniit atorfillit allat pineqartunut ilaapput, tunngavissarititaalluni pineqartup § 39, imm. 2-imi tunngavissarititaasut naammassisimassagai. Suliami paasissutissat nalilersuinerillu inaarutaasumik naammassineqareerpata, Immikkut Aningaasaqarnikkut aamma Nunani tamalaani Pinerluttuliornermut Naalagaaffimmi eqqartuussissuserisup, takuuk § 42, imm. 2, nalunaarutigissavaa inuup § 39, imm. 2-imi tunngavissarititaasut naammassisimanerai, taamaattoqarsimappallu neriorsuutaagallartumik suliffeqarfiup imaluunniit kattuffiup § 41, imm. 2, nr. 2 malillugu pissarsiarisimasaanut naapertuuttumik, unnerluutiginninnginnissaq imaluunniit akileeqqusissummik annikillisisinissaq nalunaarutigissallugu.

Kapitali 10

Atuutilersitsinermut ikaarsaariarnermullu aalajangersakkat il.il.

§ 44. Inatsisartut inatsisaat ulloq 1. juli 2014 atuutilerpoq.

Imm. 2. Peqatigisaanik unammilleqatigiinneq pillugu Inatsisartut inatsisaat nr. 16, 19. november 2007-

imeersaq atorunnaarsinneqarpoq.

Imm. 3. Nalunaarutit unammilleqatigiinneq pillugu Inatsisartut inatsisaat nr. 16, 19. november 2007-imeersaq malillugu atuutilersinneqartut, maleruagassanit Inatsisartut inatsisaat manna malillugu aalajangersarneqartunit taarserneqarnissamik imaluunniit atorunnaarsinneqarnissamik tungaanut atuutiinnassapput:

- 1) Unammilleqatigiinnermut Ataatsimiititaliap suleriaasia aamma ingerlatsinera pillugu Namminersornerullutik Oqartussat nalunaarutaat nr. 2, 1. februar 2008-imeersaq.
- 2) Suliffeqarfinnut pisortanit pigineqartunut aalajangersimasunut tutsinneqarsimasunik tapiissutit utertillugit akilernissaat pillugu Namminersornerullutik Oqartussat nalunaarutaat nr. 18, 27. juni 2008-imeersaq.
- 3) Unammilleqatigiinneq pillugu inatsisartut inatsisaanni kaaviiartitat ilaalu ilanngullugit naatsorsortarnerannut Namminersornerullutik Oqartussat nalunaarutaat nr. 22, 1. juli 2008-imeersaq.

Inatsisartut inatsisaat nr. 24, ulloq 17. november 2017-imeersaq (Suliassa qarfinni aalajangersimasuni unammilleqatigiinnermik aqutsineq, attaveqatigiissutit elektroniskiusut nunanillu tamalaanik suleqateqarneq)[1] atuutilersitsinissamik aalajangersagaq makkuninnga imaqarpoq:

§ 3

Inatsisartut inatsisaat atortuulissaaq 30. december 2017.

Inatsisartut inatsisaat nr. 8, 12. juni 2019-imeersaq (Sulia qarfiit aalajangersimasut siunnerfigalugit elektroniskiusunik attaveqatigiinnermut atatillugu unammilleqatigiinnermik aqutsinerup aningaasalersornera kiisalu Unammilleqatigiinnermut Ataatsimiititaliami ilaasortassanik toqqaasarneq)[2] atuutilersitsinissamik aalajangersagaq makkuninnga imaqarpoq:

§ 2

Inatsisartut inatsisaat 1. juli 2019-imi atuutilissaaq.

Inatsisartut inatsisaat nr. 8, 19. november 2020-meersaq (Allannguutit kattunnerni ikaarsaariarnermi naliusut aamma kinaassutsimik isertuussilluni saaffiginnissuteqartarnerit, kiisalu allaffissornikkut akiliisitsissutissanik nalunaaruteqartarneq)[3] atuutilersitsinissamik aalajangersagaq makkuninnga imaqarpoq:

§ 2

Inatsisartut inatsisaat atuutilerpoq ulloq 1. januar 2021.

Inuussutissarsiornermut Naalakkersuisoqarfik, ulloq 26. marts 2021

Isak Nielsen Kleist

/

Rannvá Clementsen

[\[1\]](#) Inatsimmi allanngortinneqartumi pineqarput Kapitali 5 a, § 30, stk. 3, § 31, stk. 4, § 33, § 35, stk. 1, aamma § 38.

[\[2\]](#) Inatsimmi allanngortinneqartumi pineqarput § 23 s, aamma § 27.

[\[3\]](#) Inatsimmi allanngortinneqartumi pineqarput § 15, stk. 1, § 32 a, aamma § 38 a.

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut